

十三經注疏校勘記

毛詩注疏校勘記序

攷異於毛詩經有齊魯韓三家之異齊魯詩久亡韓詩則宋以前尙存其異字之見於諸書可攷者大約毛多古字韓多今字有時必互相證而後可以得毛義也毛公之傳詩也同一字而各篇訓釋不同大抵依文以立解不依字以求訓非孰於周官之假借者不可以讀毛傳也毛不易字鄭箋始有易字之例顧注禮則立說以改其字而詩則多不欲顯言之亦或有顯言之者毛以假借立說則不言易字而易字在其中鄭又於傳外研尋往往傳所不易者而易之非好異也亦所謂依文立解不如此則文有未適也孟子曰不以文害辭

不以辭害志孟子所謂文者今所謂字言不可泥於字而必使作者之志昭著顯白於後世毛鄭之於詩其用意同也傳箋分而同一毛詩字有各異矣自漢以後轉寫滋異莫能枚數至唐初而陸氏釋文顏氏定本孔氏正義先後出焉其所遵用之本不能畫一自唐後至今鈔版盛行於經於傳箋於疏或有意妄更或無意譌脫於是繆盭莫可究詰因以臣舊校本授元和生員顧廣圻取各本校之臣復定是非於以知經有經之例傳有傳之例箋有箋之例疏有疏之例通乎諸例而折衷於孟子不以辭害志而後諸家之本可以知其分亦可以知其一定不可易者矣臣阮元恭記

引據各本目錄

經本二

唐石經二十卷

今行於世款式不具列

南宋石經殘本

高宗御書在今杭州府學碑存十石每石四列列四十五行行十八字惟末石三列碑內

不分卷第其周南召南小雅大雅下亦無第一第二等字小序皆連經文每篇另起每章連接凡篇後幾章幾句及風雅頌後總計章句皆無之末石有秦檜跋語第一石周南起至報我不述止第二石送子涉淇起至青青子佩止第三石悠悠我思起至維子之故羔裘豹止第四石褻自我人究究起至輾轉伏枕止第五石采芣祁祁起至我有嘉賓中心止第六石好之鍾鼓既設起至我獨居憂止第七石毛取其血膋起至經營四方何草止第八石不元何人不矜起至于時言言于止第九石入覲以其介圭起至薄言駟者有驥有止第十石駟有駟有維起至末字體小楷書凡遇避諱字皆本字缺筆如佳作倅貞作貞殷作殷桓作桓竟作竟恒作恒估作仕慙作慙又作慙微作微楨作楨朗作朗姑作姑敬作敬禎

作頤是也經文大率與今本同唯鴟鴞子尾脩脩竹竿遠兄弟父母園有桃不知我者謂我士也驕不知我者謂我士也罔極椒聊碩大且篤鶴鳴它山之石烈祖來假來饗皆與唐石經同今書中已詳載唐刻故附存其目於此以見南宋時經猶爲善本攷古者宜所寶貴矣

經注本三

孟蜀石經殘本二卷

自召南鵲巢箋爵位故以興焉爵字起至邶風之二子乘舟二章章四句止分

四注夾行每行字二十及廿一二三不等宋晁公武云毛詩二十卷張紹文書其注或義或脫或不同又云昔議者以太和石本授寫非精時人未之許書中凡淵民世字皆缺筆避唐諱察字缺筆避家諱也今攷經文如日月篇乃如人之兮谷風篇不以我能愔非誤倒卽誤衍又昔育恐有鞠脫下育字毛傳育鞠之育訓長鄭箋昔育之育訓穉云昔幼穉時恐至長老窮匱無下育字則與傳箋正義不合此經文之誤也傳文如草蟲篇阜螽蟊蟊也今所傳各本無下螽與爾雅說文合正義亦引定本云作蟊螽者衍字采蘋篇藻聚藻也下

有沈曰蘋浮曰藻六字與物理不合是據釋文所引韓詩增人也羔羊篇曰古者素絲以英裘乃作黃裳其譌不辨自明此傳文之誤也箋文如采蘋篇蘋之言實也實乃賓之譌行露篇不以角乃以味乃味之譌野有死麕篇動其佩飾下衍悅音稅也四字終風篇然而已不能得而止之脫不能得而止之六字此箋文之誤也其餘乖異甚多均無足采惟甘棠箋重煩勞百姓較今本少不字與漢書司馬相如傳方今田時重煩百姓合是條差爲可取今此記槩不錄入餘詳嚴杰蜀石殘本毛詩考證

宋小字本二十卷

分卷與唐石經同以隋唐著錄考之鄭箋元第如此每半葉十三行每行大小皆二

十四字第一卷第一行題毛詩卷第一第二行題唐國子博士兼大子中允贈齊州刺史吳縣開國男陸德明釋文附第三行題周南關雎詁訓傳第一以下題毛詩國風以下題鄭氏箋第二卷以後無唐國子云云一行餘悉同前段玉裁云南宋光宗時刻也

重刻相臺岳氏本二十卷

分卷與唐石經同乾隆四十八年武英殿仿宋本款式不具列

注疏本四

十行本七十卷

分經注本第一卷爲五第二卷爲三第三卷爲三第四卷爲四第五卷爲三第六卷爲四

第七卷爲三第八卷爲三第九卷爲四第十卷爲三第十一卷爲二第十二卷爲三第十三卷爲二第十四卷爲三第十五卷爲三第十六卷爲五第十七卷爲四第十八卷爲五第十九卷爲四第二十卷爲四共七十卷以正義序及唐志考之非孔疏四十卷之舊也每半葉十行每行大十八字小二十三字經作大字注釋文正義皆小字雙行在其下釋文首加○隔之正義首加疏字圍其外隔之首列毛詩正義序次鄭詩序次周南召南譜第一卷第一行題附釋音毛詩注疏卷第一其下側注一之一行末題云一餘卷皆然第二行第三行題唐國子祭酒上護軍曲阜縣開國子孔穎達奉勅撰餘卷無第四行題周南關雎詁訓傳第一以下題毛詩國風以下題鄭氏箋卽以釋文正義各繫其下第二卷第二行題毛詩國風鄭氏箋孔穎達疏共爲一行每空二字以後各卷大略同前日本山井鼎所云朱版卽此書其源出於沿革例所云建本有音釋注疏遞加脩改至明正德時山井鼎云與正德刊本略似不知其似二而實一也是爲各本注疏之祖

閩本注疏七十卷

用十行本重雕分卷同山井鼎所云嘉靖本也明御史李元陽僉事江以達刊今行

於世款式不具列

明監本注疏七十卷

用閩本重雕分卷同山井鼎所云萬厯本也今行於世款式不具列

汲古閣毛氏本注疏七十卷

用明監本重雕分卷同山井鼎所云崇禎本也今行於世款式

不具列

引用諸家

陸德明毛詩音義三卷

山井鼎考文毛詩陸冊

浦鏜毛詩注疏正誤十四卷

陳啟源毛詩稽古編二十卷

惠棟毛詩古義二卷

戴震毛鄭詩考正四卷

段玉裁校定毛傳三十卷又詩經小學三十卷

毛詩注疏校勘記卷一 一起一盡十

臣阮元恭撰

毛詩正義序

閩本明監本毛本於此下題唐國子祭酒上護軍曲阜縣開國子臣孔穎達等奉勅撰案十行

本題於卷第一之首移在序下者非其舊也凡序經注疏之文十行本皆平行接寫唯章句低三字閩本以下分高低數等又多提行皆非其舊

日下之無雙

閩本明監本毛本同案之下當有所字錯入下句

於其所作疏內

閩本明監本毛本同案當作其於作疏內其於二字誤倒所字上句錯在此

非有心於愛增

閩本明監本毛本增作憎案憎字是也古或用增為憎字如墨子帝式是增之

屬唐時則不應爾矣。按此因上文有增其所簡而誤耳

謹與朝散大夫

明監本謹與誤議典閩本毛本不誤

詩譜序

毛本此序文并正義悉脫閩本明監本有案毛本即據明監本重刻乃其本偶失此序更不知補誤甚

三言
稱農始作耒耜

明監本稱下行神字閩本不誤

則懷嬉戲抃躍之心

明監本抃誤忤閩本不誤

藝論所云

閩本明監本同案此不誤浦鍾云上當脫六字非也藝論與六藝論互見即其省耳餘同

此詳考浦書失多而得寡茲所采外不勝駁正以後所列用爲舉例推類求之大略可知矣

放於此乎隱二年公羊傳文

閩本明監本同案此不誤浦鍾云放傳作昉非也隸

釋載漢石經公羊殘碑字作放版本作昉鄭考工記注引亦作放可證也凡正義所引經典有所見本如此不容執今本以相比較者此類是矣

格則乘之庸之

閩本同明監本乘作承案所改是也

詩緯含神務云

閩本明監本同案此不誤浦鍾云霧誤務非也後漢書樊英傳注載七緯之名

字正作務因學紀閩亦然其又作霧者霧務聲同得相通借不當以霧改務也餘同此

蓋周室之初也

閩本明監本同案也當作世形近之譌

止有論功頌德

閩本明監本頌誤顯

是后稷自彼堯時

閩本明監本誤作是后稷播種之時山井鼎考文載此堯下有之字誤衍

距此六十二歲

閩本明監本同案浦鏗云一誤二以春秋考之浦校是也

五霸之字或作五伯

明監本字誤末閩本不誤

鄭語註云

閩本明監本同案浦鏗云註衍字以國語考之浦校是也

厲幽陳靈

閩本明監本厲幽誤倒

是用詩義也

明監本用誤詩閩本不誤

魯真公之十四年

閩本同明監本真誤貞物觀考文補遺載此無之字誤脫

周南召南譜

閩本明監本毛本移此譜入卷第一中鄭氏箋正義之後案十行本與譜序接連考書錄解題

云正義備鄭譜於卷首陳氏所見乃正義原書為得其實則知鄭譜散入各處不復總聚於譜序下者後來合併經注正義時所改也此一譜與譜序接連正其跡之未經盡泯者閩本以下所移非是且鄭氏箋正義之後屢入此一譜於正義之次序尤屬紊亂失之甚矣又正義所載鄭譜是其原第檜在鄭前王城在幽後兩正義屢有明文而鄭譜正義云對上檜風已作故云又作尤為顯證可見散入各處之失也

周文王所居也

閩本明監本毛本同案浦鏜云大誤文以漢書考之浦校是也

此詩猶美江漢汝墳

明監本毛本猶誤有閩本不誤

明化己之可知

明監本毛本化己誤倒閩本不誤

此詩既繼二公

明監本毛本同案浦鏜云繼當繫字誤是也

騶虞歎國君之仁心

明監本誤作騶虞之與鵲巢未必閩本毛本不誤

此譜於此篇之大略耳

閩本明監本毛本同案下此字當作比形近之譌

且非此所須故也

閩本明監本毛本此誤世

楚滅六并蓼

閩本明監本毛本蓼誤茂

附釋音毛詩注疏卷第一

一之一

一

閩本明監本毛本無附釋音三字又一之一下

無一字案閩本以下仍附刻釋文獨刪其題非也十行本於每卷之下自一之一至二十之四凡七十皆標其數考正義原書分四十卷自正義序及唐書新舊志宋著錄各家悉同其分二十卷者經注本也合併時取正義散入經注本之中而四十卷之舊遂不復存亦無由知其七十卷之何所本也閩本以下輒刪一二等字其刪之未盡者僅閩本一二處而已非也餘同此

唐國子祭酒上護軍曲阜縣開國子孔穎達奉勅撰

閩本

明監本毛本移此在前正義序下而於此題云毛詩國風漢鄭氏箋唐孔穎達疏非也案毛詩國風鄭氏箋具題在周南關雎詁訓傳第一之下不容複出於上也其一之二以後十行本每卷題毛詩國風鄭氏箋孔穎達

毛詩注疏校勘記

卷一

三

監本毛本又誤倒其次序唯此孔穎達下脫等字當補

詁訓傳

唐石經小字本相臺本同案此正義本也正義云今

漢書藝文志作故與釋文引舊本及樊孫等爾雅本皆為釋故合當以釋文本定本為長正義原書與經注別行後來合併實始於南宋紹興間三山黃唐所編彙此本又在其後事載左傳考文其所用經注本非正義之經注也故經注與正義時有相牴牾者而考以集注本定本俗本釋文本唐石經本亦未有全然相合者也乃彼時行世別有此本耳茲條列其同異所自出俾各有考焉

瓠葉捨番番之狀

閩本明監本毛本同案此不誤浦鐘

盡據本文如出其東門引白旆英英以說英字而本詩作央可證

字從竹弟

閩本明監本毛本弟誤去

趙人毛長傳詩

閩本明監本毛本同案此不誤浦鐘云甚誤長非也釋文序錄云一云名長通

志堂本作甚者誤詳後考證困學紀聞引作長云今後漢書作甚亦其證也

魯人大毛公爲詁訓傳閩本明監本毛本詁訓誤倒

是不由作之先後明監本毛本後下衍也字閩本不衍

有康叔之餘烈閩本明監本毛本餘誤遺

不以數次爲無筭也閩本明監本毛本數作不案不字是也

故諸爲訓者明監本毛本爲下衍傳字閩本剗入

詁訓毛自題之明監本毛本訓下有傳字閩本剗入案所補是也

○關雎

后妃之德也閩本明監本毛本於此節及後節用之邦國焉下皆有注小字本相臺本無考文古本同案山

井鼎云皆釋文混入於注是也十行本附釋音與注文疏文皆雙行小字唯釋文首加圓圍爲別耳故重刻者致誤也又

明監本注單行小字側書闕本毛本別為中等字皆非其舊

所以風天下

唐石經小字本相臺本同案正義云定本所以風天下俗本風下有化字誤也考文古本有采

正義考顏師古為太宗定五經謂之定本非孔穎達等作正義之本也俗本謂當時通行之本亦非即作正義者兼不專指一本故禮義廢下云俗本有作儀者野有死麕序下云或有俗本以天下大亂以下同為鄭注者誤是也由此推之則正義本之大槩可見矣定本出於顏師古見舊新二唐書太宗紀顏籀傳封氏聞見記貞觀政要等書段玉裁所考得也

當天子教諸侯教大夫

闕本明監本毛本重諸侯二字案所補非也此謂鄉大夫亦天

子教之

風風也

唐石經小字本相臺本同案釋文云徐上如字下福鳳反崔靈恩集注本下即作諷字考正義標起止云

風風是正義本不作諷正義下文又云風訓諷也者風諷古今字凡經注古字正義每易為今字而說之其為例如此也今往往有合併時依經注誤改者矣

平言之而意不足

閩本明監本毛本平誤既

發猶見也

閩本明監本毛本首有箋字小字本相臺本無考文古本同案山井鼎云箋云二字鄭申毛傳

所以別之也毛不注序無可辨嫌故序注本應無箋字後世諸本不知而妄加非亦甚矣其詳見於正義釋文是也凡序注之首十行本悉無箋字閩本以下乃誤加耳餘同此

謂宮商角祉羽也

小字本相臺本社作徵閩本明監本毛本亦同案考正義釋文皆作徵此祉字

當是宋經注本避當時諱字耳

一人之身則能如此

閩本明監本毛本身誤心

下云治世之音謂樂音

閩本明監本毛本云誤文

彈其官則衆官應

毛本其誤以閩本明監本不誤

名得相通也

閩本明監本毛本名誤各

而民思憂

閩本明監本毛本思憂誤剛毅案浦鍾校此下用樂記補數十字皆非也考正義引羣籍

有引其意不全用其文不可依本書改竄者此類是矣

故正得失

唐石經小字本相臺本同案釋文云正本又作政正義云此正得失與雅者正也正始之道本或作

政皆誤耳今定本皆作正字正義本之同於定本者此類是也凡正義既著其所從又兼載異本或與定本同或與俗本同也

精誠之至

閩本明監本毛本至誤志

地曰祇

毛本祇誤祇閩本明監本不誤

厚人倫

唐石經小字本相臺本同案釋文云本或作序非考正義本是厚字與釋文本同

夫妻反目

毛本妻誤婦閩本明監本不誤

風言賢聖治道之遺化

閩本明監本毛本賢聖誤倒下同

賦者直陳其事明監本毛本者誤之闕本不誤

以諸侯列土樹疆闕本明監本毛本樹誤封

史記稱微子過殷墟闕本明監本毛本同案此不誤浦鏗云尚書大傳云微子史記世家

作箕子非也此正義自涉大傳耳非由字譌黍離正義引作箕子如鄭志問甘棠正義兩引譜下作趙商本篇

下作張逸也

治致升平闕本明監本毛本致升誤政昇

諸侯彊盛明監本毛本彊誤疆闕本不誤

聞之者足以戒唐石經小字本相臺本同案正義云俗本戒上有自字者誤定本直云足以戒也文選載

此序有自字即俗本也考文古本有采正義

皆用此上六義之意闕本明監本毛本同案十行本上至之刺添者一字

人君不怒其作主

明監本作誤非閩本毛本不誤案作主謂作詩之主也後正義引鄭荅張

逸云其無作主皆國史主之此用彼文

穆叔賦而晉人不得怨之

明監本毛本賦下衍詩字閩本刻入

若唐有帝堯殺禮救危之化

閩本明監本毛本同案浦鍾云厄誤危以唐譜考之

浦校是也

詩人懷挾之也

明監本毛本挾誤救閩本不誤

明作詩皆在民意

閩本明監本毛本在誤出

要所言一人心

閩本明監本毛本人下有之字案所補是也

言王政之所由廢興也

唐石經小字本相臺本同案正義云定本王政所由廢興俗本王政下有

之字誤也是有之字者出於俗本凡斥云誤者意所不從其於定本亦然

代殷繼伐

明監本毛本誤作伐殷繼代閩本不誤案代殷用皇矣序文繼伐用文王有聲序文

所以報神恩也

閩本明監本毛本同案十行本以至也剗添者一字

大雅也頌也此四者人君行之

閩本明監本毛本同案十行本大雅之剗添者

三字是此四者三字衍也

則春秋云

閩本明監本毛本同案此不誤浦鍾云春秋下當脫左氏傳三字非也凡引其書之支屬

即稱其大名如易緯單稱易書序單稱書古人之通例不可枚舉者也

故繫之召公

毛本繫誤繁明監本以上皆不誤

不為滅傷其愛

閩本明監本毛本滅誤滅明監本傷誤

是其善道必全

閩本明監本毛本全誤至

興也

閩本明監本毛本首有傳字小字本相臺本無考文古本同案山井鼎云後人加也是也十行本悉無此

字闕本以下乃誤加耳餘同此

鴟鳩王雉也鳥摯而有別

小字本相臺本皆同案正義云俗本云雉鳩王雉之鳥者誤也

考俗本當是傳箋每少也字即顏氏家訓所謂河北經傳悉略此字者也故誤讀鳥字斷句又添之字以足成之

若關雎之有別焉

小字本同闕本明監本毛本亦同相臺本關雎作雉鳩案關雎是也下傳云有

關雎之德可證相臺本因正義云若雉鳩之有別因改此傳考正義凡自爲文每不必盡與注相應不當據改也考文古本作雉鳩采正義而誤

箋云

闕本明監本毛本於箋字外以黑圈之小字本相臺本所無也考文古本同案山井鼎云箋云二字鄭氏

之舊所以別毛氏傳也而後世諸本加黑圈者亦失古意矣是也十行本凡箋字及正義中傳箋字悉不如此闕本以下誤耳考其致誤之由乃因正義標起止有傳字箋字遂於注首加傳字復割裂注中箋字配之不知此正義自爲文以作別識耳非注如此也明刻單注別本更有并箋下云字去之者尤爲誤甚餘同此

雌雄情意至

小字本同閩本明監本毛本亦同相臺本雌雄作雄雌案正義作雌雄相臺本誤也

怨耦曰仇

也小字本相臺本同案釋文云好逑音求毛云匹也本亦作仇音同鄭云怨耦曰仇是釋文本經

傳作逑箋作仇也正義本箋字未有明文當亦與釋文本同臧琳經義雜記云箋既不云逑當爲仇則說異而字同其說非也凡箋於經字以爲假借者多不言讀爲而顯其爲假借有二例焉一則仍用經字但於訓詁中顯之如容今遂兮箋遂瑞也以遂爲璫之假借价人維藩箋价甲也以价爲介之假借是其類也一則於訓釋中竟改其字以顯之如此經之逑箋則曰怨耦曰仇以逑爲仇之假借及湜湜其止箋之小渚曰沚山有橋松箋之槁松在山上可以樂飢箋之可飲以療飢皆其類也二者皆不言讀爲也於訓釋中竟改其字者人每不得其例今隨條說之以去其癥結其仍用經字但於訓詁中顯之者人所易曉不悉說焉臧琳又以爲徧考毛詩免豎無衣皇矣等逑匹之逑皆作仇此經作逑出後人私改亦非也凡毛氏詩經中之字例不盡一如或用害或用曷而同訓何或用肩或用豸而同訓獸三歲其類衆矣他經用仇此經用逑不嫌同訓未可據彼改此說文逑下云又曰怨匹曰逑正說逑爲怨

匹字之假借其釋文所載本亦作仇者是依箋改經出之於下意所不從章懷注後漢書李善注文選雖經引用要卽所謂以破引之實非毛氏詩舊文也

后妃雖說樂君子

明監本毛本雖誤能闔本不誤案說當作悅下文作悅可證也注作說正義作悅說悅古今字易而說之也例見前餘同此

陸機疏云

毛本機誤璣闔本明監本不誤案考隋書經籍志作機釋文序錄同唯資暇集有當從玉

旁之說宋代著錄元恪書者多采之毛本因此改作璣其實與士衡同姓名耳古人所有不當改也餘同此釋文亦或誤今正詳後考證

而揚雄許慎

闔本明監本揚作揚毛本作揚案子雲姓本從木宋以來或誤從才闔本明監本是

也餘同此

又無怨爭

闔本明監本毛本又誤以

其葉符

閩本明監本毛本同案浦鏜云符誤符以爾雅考之浦校是也

鬻其白莖

閩本明監本毛本同案浦鏜云鬻誤鬻者凡陸疏鬻字皆當作鬻乃形近之譌浦校是也

天官序官注云

閩本明監本毛本官誤官

卧而不周曰輶

小字本相臺本同案此正義本也釋文云鄭云不周曰輶注本或作卧而不周者剩

二字也案釋文與正義迥非一本茲著其文字之異其但偏旁不同而正義本已載釋文亦作又作或作者不復悉出

故易之也

明監本毛本易誤思閩本不誤

鍾鼓樂之

唐石經小字本相臺本同閩本同明監本毛本鍾作鐘案鍾字是也五經文字云今經典或通用鍾

為樂器是其證餘同此

與詩禮俱興也

閩本明監本毛本同案禮當作體形近之譌

婁豐年之類也

閩本明監本毛本婁誤屢

摯虞流外論云

閩本明監本毛本同案山井鼎云外當作別是也

仲冶之言

閩本同明監本毛本冶作治案山井鼎云冶當作治是也

乎者俟我于著乎而

閩本明監本毛本同案乎者當作著此句稱著與下句稱伐檀對文

也誤分爲二字又改之爲乎

伐檀且漣猗之篇

明監本毛本猗誤漪閩本不誤

魯頌實不及制

閩本明監本毛本頌誤僖

○葛覃

后妃在父母家

唐石經小字本相臺本同案正義云定本后妃在父母家無之字化天下以婦道無成字

有者衍也考文古本有之字采正義

葛覃三章章六句至以婦道

閩本明監本毛本同案正義本章句在篇前故標起

止如此唯開雖獨不然於全書相反當是南宋合併時所移也合併所用經注本章句在篇後釋文唐石經小字本相臺本皆然與開雖正義所云定本合與正義本不合餘同此

因事生義

毛本生誤主閩本明監本不誤

喻其容色美盛也

小字本相臺本無也字閩本明監本毛本有案此也字當衍

灌木藜木也

小字本相臺本同考文古本毛本明監本毛本藜作藜案正義作藜釋文藜反俗

作藜一本作藜作外反段玉裁云當作藜取積也從一從取才句反古書藜字多誤為藜字從口是以顏黃門說周氏劉氏讀祖會祖會二反釋文亦云一本作藜作外反也今考皇矣傳云灌木叢生也當以釋文正義本為長

或謂之黃栗留

明監本毛本栗誤栗閩本不誤

謂之黃鸝

毛本鸝誤鸝閩本明監本不誤案段玉裁云廣韻鸝鳥羽文也鸝黃鸝二字有別爾雅疏

三言
即取此字正作驚

看我麥黃甚熟亦

閩本明監本毛本同案亦當作不與上句留字韻。按州木蟲魚疏正作

不

漢煑之也

小字本相臺本同案釋文漢下云煑也無之字考釋文之例無毛云鄭云者或用已意增損注

文如下傳精曰繡釋文締下云葛之精者曰締皆其類也但此傳毛用爾雅文之字不當去考文古本無采釋文

古者王后織元紃

小字本相臺本同案正義云俗本王后下有親字紃紃大帶上有織字皆衍也

考文古本有親字采正義

庶士以下

小字本相臺本同案釋文庶士本或作庶人正義本是士字與釋文本同考國語或本誤

以煑之於澁

閩本明監本毛本同案此不誤蒲鑑云當作鑊非也考爾雅作是又是鑊鑊煑之也

皆用正字此皆用假借爾雅釋文鑊又作澁同

纓之無綬

閩本同明監本毛本綬作綬案綬字是也考鄭周禮注云士冠禮及玉藻冠綬之字故書

亦多作綬者是冠綬字誤爲綬久矣鄭定用綬字唐時不應更用綬也

婦人謂嫁曰歸

小字本相臺本同案正義云定本歸上無曰字釋文云本亦無曰字此依公羊傳文

考此卽楚人謂乳穀謂虎於菟之類毛傳文古故其語亦如此當以定本爲長其鄭箋則有曰字見江有汜南山

害何也

小字本相臺本同閩本明監本毛本害誤曷案段玉裁云此謂害爲曷之假借傳例如此

傳亦宜然○南山箋云姜與姪娣

閩本明監本毛本同案然下浦鏜云誤衍

○姜上浦鏜云脫文字是也

若不分婉爲言語

閩本明監本毛本婉誤婉

容貌以事人女功而就業

明監本事人誤表之女功誤闕二字閩本毛本不誤

故曲禮曰

毛本日誤云閩本明監本不誤

此後妃華國之長女

閩本明監本毛本莘誤并

取彼成文

閩本明監本毛本彼誤配

隱二年公羊傳文

閩本明監本毛本二年誤正義

以衣汙垢者

閩本明監本毛本衣誤澣

故王肅述毛合之云

閩本明監本毛本合誤答

至祿衣○正義曰

閩本明監本毛本脫正義曰三字

至歸寧○正義曰

閩本明監本毛本脫正義曰三字

父母雖沒猶歸寧

明監本毛本雖誤既閩本不誤

至君子○正義曰

閩本明監本毛本脫正義曰三字

若如傳言私服宜否

閩本明監本毛本服下有宜澣公服四字案所補是也

○卷耳

言又者繫前之辭

閩本明監本毛本又誤賢

言后妃嗟呼而歎

閩本明監本毛本呼作吁案所改是也

后妃主求賢人爲此

毛本求誤來閩本明監本不誤

江東呼常臬

閩本明監本毛本同案此不誤浦鏜云脫爲字非也郭景純時語自如此今爾雅注

多云呼爲者或後人添耳

君賞功臣

小字本相臺本同考文古本同閩本同明監本毛本君誤若案閩本明監本毛本正義中亦誤

若

后妃言升彼崔嵬山巔之上者

明監本毛本言下衍我字閩本剝入巔誤顛

此及下傳云

明監本毛本及誤反閩本不誤

衛侯饗苦成成叔

閩本明監本毛本不重成字案此蓋以苦成爲邑成爲諡前人亦多言卻

肆證成者其左氏傳舊解與

云何吁矣

唐石經小字本相臺本同案爾雅注詩曰云何吁矣邢疏云卷耳及都人士上文也郭所稱未必爲毛

氏詩邢氏不辨此經作吁而引之非也考釋文石經此作吁而都人士及何人斯作吁者吁爲正字吁爲假借經中用字例不畫一也例見前

痛亦病也

小字本相臺本同案釋文云痛病也一本作痛亦病也者非正義本標起止有亦字考傳文不

嫌於瘡病也之下更云痛病也當以釋文本爲長

而今云何乎

小字本相臺本同考文古本平字亦同閩本明監本毛本平誤吁

○樛木

而無嫉妬之心焉

唐石經小字本相臺本同案正義云定本焉作也考文古本作也采正義

后妃能和諧衆妾不嫉妬其容貌恒以善言逮下而安之

小字本相臺本同案此二十二字非鄭注也釋文云崔集注本此序有鄭注檢衆本並無是釋文本無此注也序云言能逮下正義云言后妃能以恩意接及其下衆妾而此注以序中言字爲善言於正義無文是正義本亦無此注也且以言爲善言既不出於經亦不更見箋中必非鄭注審矣各本乃沿崔集注之誤當據釋文正義正之

謂荆楊之域

小字本相臺本楊作揚閩本明監本毛本亦作揚案正義字皆作揚考春秋元命包以爲地多赤楊引見於建康實錄是字本從木也其李巡爾雅注劉熙釋名皆以輕揚爲義唐人遂但用從才字然則鄭箋應本作揚字釋文正義二本應俱作揚字餘同此

一名巨爪

閩本明監本毛本爪作爪案皆誤也當作荒易釋文齊民要術可證

令之次敘進御

閩本明監本毛本同案注作序正義作敘序敘古今字易而說之也例見前考

文古本注亦作敘是用正義以改注由不悉正義之例故也

降邇遐福

閩本同明監本毛本邇作爾案爾字是也

○各蟲斯

德是也

閩本明監本毛本同案此不誤浦鏜云德是二字當衍文非也德者對色而言與下文以行曰

忌意同讀當三字爲一句也

維蚣蝓不耳

小字本相臺本同案釋文云不耳本或作不然正義云則知唯蚣蝓不耳是正義本作耳

不字當上聲讀考古古本耳作爾考他箋所用耳字多誤爲爾而正義中仍有未誤者考古古本遂不知耳爾二字有別混而一之

則又宜汝之子孫

閩本明監本毛本同案注作女正義作汝女汝古今字易而說之也例見

前考文古本注女亦作汝非餘同此

肱鳴者也

閩本同明監本毛本肱作股案股字是也鄭考工記梓人注云股鳴蚣蝓動股屬

或謂似蝗而小班黑閩本明監本毛本同案此不誤浦鏗云斑誤班非也班卽斑字耳浦
於通借多改正義之舊茲並不采焉

其股似瑋瑁又閩本明監本毛本同案又當作义形近之譌

若祿衣之類

閩本明監本祿誤緣毛本誤緣案祿衣見鄭綠衣序注正義用彼文

則知唯蚣蝑不耳

閩本明監本毛本同案注作維正義作唯維唯古今字易而說之也例見

前餘同此考文古本注維亦作唯采正義而誤東山序其唯東山乎用唯字者序字亦不與經注同也

○桃夭

婚姻以時

小字本同閩本明監本毛本同唐石經相臺本作昏案昏婚古今字序用昏字唐石經相臺本是也

正義每易爲婚字而說之今正義此作昏者亦後改也餘同此其引士昏禮及行露苑有苦葉昏時等仍用昏者非此例

國無鰥民也

唐石經小字本相臺本同案正義云國無鰥民焉乃正義自爲文標起止無焉字可證考文古

本有焉字采正義而談

襄二十八年

閩本明監本毛本同案浦鏜云七誤八以左傳考之浦校是也

故爾雅云無夫無婦

閩本明監本毛本同案爾當作小雅者今在孔叢第十一此其廣

名文也狼跋文王正義皆云膚美小雅廣訓文是其證浦鏜云爾雅上脫小字非也唐人如李善文選注之類多稱小雅漢書志云小雅一篇誤本乃作小爾雅耳

婦人曰厘

閩本明監本毛本厘作釐案厘是當時俗釐字巷伯傳云釐婦釐俗作釐

无咎无譽

閩本明監本毛本二无字誤無案引易文舊多作无其非易文閒亦作无則當時寫書人

以无爲無之別體也餘同此

雖七十無主婦

閩本明監本毛本同案浦鏜云脫一無字以禮記考之浦校是也

興者踰時婦人

閩本明監本毛本同小字本相臺本踰作喻考文古本同案喻字是也山井鼎云諸

本皆誤但據注疏本而言耳

桃之至室家

閩本明監本毛本誤作桃之夭夭至其室

謂年時俱善為異

閩本明監本毛本同案善當作當考正義上下文可證

家猶夫也猶婦也

閩本明監本毛本同案猶婦上當脫人字

○免置

有武力可任為將帥之德

小字本相臺本同案盧文弨云釋文無可字非也釋文上出任

為下出可任其任為上有可字與否不能知也考文古本乃無可字耳

此免置之人敵國有來侵伐者

小字本相臺本免置作置免案置免是也箋三章皆

云此置免之人不應一章獨倒序正義云箋云置免之人首章正義云言此置免之人卒章正義云鄭以為此置免之人皆順箋文也其云故免置之人又經直陳免置之人賢又毛以為免置之人者不主說箋故順經文也閩本明

監本毛本於正義中盡改爲免置之人失之甚矣考文古本首章箋作此免置之人閩本明監本毛本此章及下章箋作此免置之人皆誤

使之慮事閩本同小字本相臺本事作無明監本毛本亦作無考文古本同山井鼎云一本作事考疏作無爲是是也

箋此置至言賢明監本毛本此下衍免字閩本不衍

○芣苢

和平則婦人樂有子矣唐石經小字本相臺本同案正義云定本和平上無天下二字據箋則有者誤也考文古本有采正義

此要政治時和閩本明監本毛本治誤治

卒章言所成之處閩本明監本毛本同案浦鍾云成當盛字誤是也

宜懷任焉

小字本相臺本同閩本明監本毛本任誤妊案妊身字作任者假借也又見閩官箋漢書外戚

傳云任身十四月迺生亦可證不知者改之耳閩本明監本毛本正義中亦誤妊

以繫其馬

閩本明監本毛本繫誤繫

結執衽也

毛本誤以釋文衣際也三字入注明監本以上皆不誤

薄言禴之

唐石經小字本相臺本同案釋文云擷一本作禴同正義標起止云傳結執至口禴卽一作本也考

文古本作擷采釋文考說文衣部禴擷文重實一字耳考文古本采釋文兼及字畫之異如兕作兕觥作觥之類并取諸一作又作或作本如亨本又作烹之類此皆非有異字故亦不復悉出

○漢廣

先受文王之教化

小字本相臺本同案此定本也正義本作先被考序云文王之道被于南國當

以正義本爲長

敘於此既言德廣

閩本明監本敘誤故毛本不誤

不可休息

唐石經小字本相臺本同案釋文云舊本皆爾本或休息此以意改耳正義云詩之大體韻在辭上

疑休末字爲韻二字俱作思但未見如此之本不敢輒改耳正義之說是也此爲字之誤惠棟九經古義以爲思息通非是

漢有游女

小字本相臺本同唐石經缺案此正義本也定本游作遊以出遊字從之泳游字從之爲區別也考

游古文作選隸變作遊說文云旗流者正訓也出游泳游皆假借經出游之字多作遊或亦作游非有區別當以正義本爲長

喬上竦也

小字本相臺本同案正義云定本喬上竦無木字考文古本有采正義

喻賢女雖出游流水之上

小字本相臺本同案釋文云流水本或作漢水正義本今無可

考

方汙也

小字本相臺本同案釋文云汙或作汙樊光爾雅本作相考文古本作汙采釋文或作本。按依說

文作汙是

木所以庇廕

閩本同明監本毛本庇廕作庇蔭案芘字非也正義不用此芘字

定本遊女作游

閩本明監本毛本同案十行本遊至游剡添者一字是女字衍也此當云定本

游作遊正義說經傳箋字皆作游是其本作游特著定本作遊之不同上游下游誤互易其字

不得要言木本小時可息

閩本明監本毛本小誤少

編竹木曰棧

明監本毛本曰上有大字閩本剡入是也

方之舟者

明監本毛本舟下有之字閩本剡入是也

我又欲取其尤高絜者

小字本相臺本同案釋文云一本無絜字正義標起止云至絜者是

正義本有考此箋尤高者說以楚爲喻之意也不應有絜字當以一本爲長

至意焉釋訓云

明監本毛本焉下有○又有正義曰三字闕本刻入是也

昏禮不見用牲文

問本明監本毛本文誤又

廋人云

毛本廋誤廋闕本明監本不誤下同

○汝墳

婦人能閔其君子

唐石經小字本相臺本同案此正義本也釋文云能閔其君子一本有婦人二字正

義云定本能閔上無婦人二字考鄭注序云言此婦人此者此序文也是鄭自有當以正義本為長

釋水云汝為墳

闕本明監本毛本同案浦鏗云墳當依爾雅作墳下詩云遵彼汝墳同是也○

按說文曰墳水厓也墳者墓也

故知是水名也

闕本明監本毛本故誤固

汝有墳

明監本毛本墳誤墳闕本不誤

已見君子君子反也于已反得見之

小字本同閩本明監本毛本亦同相臺本

于作於案於字是也正義作於此箋皆定本也正義云俗本多不然今無可考

故下章而勉之

小字本相臺本同閩本同明監本剗去而字毛本無案因正義云故下章勉之遂誤

刪不知正義自爲文每不盡與注相應也考文古本亦無而字采正義而誤

卽知不遠棄我而死亡

明監本毛本卽誤旣閩本不誤

辟此勤勞之處

小字本相臺本同案釋文辟此一本作辭此正義本是辟字

無得逃避若其避之

閩本明監本毛本同案注作辟正義作避辟避古今字易而說之也

例見前餘同此

以喻蒯瞶淫縱

閩本明監本毛本瞶誤瞶

憂思昔在於情性

閩本明監本同毛本昔作皆案皆字是也

麟之趾

麟之趾關雉之應也

唐石經小字本相臺本同案釋文云序本或直云麟止無之字考正義云此麟

趾處末者是正義本無之字標起止云麟之趾三章衍也

故于嗟乎歎今公子

閩本明監本毛本同案于當作吁于吁古今字注作于正義作吁易

字之例如此不知者乃改之擊鼓權輿正義亦誤氓正義不誤

言從父成

閩本明監本毛本父作父案皆誤也當作義此句說脩義母下句則神龜在沼說致智子

與洪範從作父初不相涉但當時俗字或以父爲義耳禮運正義亦誤作父

貌恭肅仁

閩本明監本肅作體毛本誤作禮案體字是也肅卽當時俗字

定題也

小字本相臺本同案釋文云題本作顛誤正義云傳或作顛又云定本作題標起止云傳定題是釋

文本正義本定本同

魯爲諸姬

明監本毛本爲誤與閩本不誤

示有武而不用

小字本相臺本同案釋文云一本示作象正義本是示字

○鵲巢

冬至架之

小字本相臺本同案此釋文本也釋文云架之音嫁俗本或作加功考正義本當作加功正義

云故知冬至加功也是其證定本當亦作加功故正義不言有異也定本出於顏師古其匡謬正俗有論此一條云始起冬至加功力爲巢也是其證顏又引劉昌宗周續等音加爲架而駁其不應言架功其說誤也劉周二本皆作加之故音架而以橫架爲義與釋文作架之者實一本也自不作功字不得以架功駁之當以釋文本爲長

而有均壹之德

閩本明監本毛本同小字本相臺本壹作一

案壹字是也均壹字當作壹一二字乃作一經中所用有互通者假借也注及正義自爲文則皆用本字矣序下注及正義皆不作一可證也此正義中又有作一字者乃寫者取省所亂餘同此

送御皆百乘

小字本相臺本同案釋文送御五嫁反一本作迎正義本是御字考經御之釋文云王肅

魚據反云待也其述毛此傳自不當仍云送御則一本或出於王肅也

婦車亦如之有供

閩本明監本毛本同案浦鏗云祿誤供以士昏禮考之浦校是也

何彼禮矣

毛本禮誤積閩本明監本不誤

今思乘以歸

毛本思誤用閩本明監本不誤

言迂之者

閩本明監本毛本同案箋及經傳皆作御此作迂御迂古今字易而說之也例見前標起

止仍云至御之可證也釋文御之本亦作訝又作迂同非正義本

方有之也

小字本相臺本同案釋文云方有之也一本無之字正義本今無可考段玉裁云一本誤傳當

云方之方有之也下傳當云成之能成百兩之禮也皆引經附傳時所刪

○采繁

苟有明德

閩本明監本毛本同案浦鏜云信誤德是也

彼言毫

閩本明監本同毛本毫作毛案毛字是也

于植南西上

閩本明監本毛本同案浦鏜云俎誤植以

及兩劔劔毫

閩本明監本毛本同案此不誤浦鏜云衍一劔字非也今特牲脫一劔字耳唐石經

有采蘋正義引亦重

主婦髮髻

小字本相臺本同案此定本也正義本髮作髻釋文云髻本亦作髻徒帝反劉昌宗吐愿反段

玉裁云考此字當作髻五經文字云髻聽亦反見詩風注謂此也劉音吐愿反可見其字作髻說文髻髮也鄭少牢注古者或剔髮者刑者之髮以易解髻所謂詰訓之法也其徒帝反者髻與髻爲一字說文五經文字與髻字皆別見卽髮也不得重在髮下定本正義本釋文本皆誤所當正也鄭少牢及追師二注本皆與此注同作髻今少牢亦一誤而爲髻追師亦再誤而爲髻也

夫人釋祭服而去髮髻

小字本相臺本同案此正義本也定本無去字正義於去字斷句定

本於髮髻斷句也惠棟云當依定本刪去字

又首服被髮之釋

閩本明監本毛本同案浦鏜云釋當飾字誤是也

案少牢作被裼注云被裼

閩本明監本毛本同案裼當作錫形近之譌

少牢云被錫纚笄

閩本明監本毛本錫誤裼案少牢作錫正義所引正作錫字明監本毛本

因上文譌作裼并盡改其未譌者誤甚下同

文王夫人

閩本明監本毛本同案浦鏜云王當主字誤是也

而髮髻無去字

明監本毛本髻誤髮閩本不誤案此述定本當用髻不用髮

○草蟲

阜螽蟻也

小字本相臺本同案正義云定本云阜螽蟻依爾雅云則俗本云蟻螽者衍字也釋文螽下云

阜蚤蟻也考文古本有采正義

婦人雖適人

相臺本同小字本雖下有未字案未字誤衍也正義可證閩本明監本毛本亦無

還來歸宗謂被出也

閩本明監本毛本謂上衍有此之義故已所以憂歸宗十一字

故下采蘇采薇

閩本明監本毛本蘇誤薇

得君子遇接之故也

閩本明監本毛本故誤禮

蘇驚也

相臺本驚作驚閩本明監本毛本同小字本作驚案釋文驚本又作驚小字本依釋文又作也釋文

舊或誤今正詳後考證

言我也我采者

小字本相臺本同案此與雄雉箋爾女也女衆君子之屬爲一例與卷耳箋我我君

也我我使臣也之屬不相同因蒙上句不煩更出也考文古本作言我也我我采者也仍更出我字非箋例也其雄雉箋作爾女也女女衆君子亦非餘同此

在塗而見采驚采者得

閩本明監本毛本同小字本相臺本下采字作

菜案菜字非也考文古本亦作菜山井鼎云屬上讀考正義標起止云言我至采驚是正義本作采讀以采者得其所欲得七字爲一句采譌爲菜并改其讀失之矣

我欲采其驚菜

毛本采誤探閩本明監本不誤

明在周也

閩本明監本毛本也誤地

○采蘋

姆教婉婉聽從

小字本相臺本同案正義云定本姆教婉婉勤禮本亦然今俗云傅姆教之誤也考

文古本作傅姆教之采正義

十有五而笄

小字本相臺本同案正義云又十有五而笄無女子二字有者亦非又者又定本也考文

古本有采正義

箋女子至法度

閩本明監本毛本箋下衍云字案鄭注序不言箋此正義所標本無云字

此祭女所出祖也

閩本明監本毛本同小字本相臺本重祭字考文古本同案重者是也正義云

知此祭祭女所出祖者可證

無足曰釜

小字本相臺本同案正義標起止云傳方曰筐至曰釜又云定本有足曰錡下更無傳俗本錡

下又有無足曰釜是正義本與俗本同也此傳錡釜屬有足曰錡互文見意不更言無足曰釜矣當以定本為長

大夫士祭於宗廟

小字本相臺本同案正義云言大夫士祭於宗室又云定本集注大夫士祭於

宗廟不作室字考下傳云必先禮之於宗室是大宗之廟但稱宗室不稱宗廟也當以正義本為長

則非禮也

小字本相臺本同案惠棟於禮下添女字非也箋說傳必先禮之之禮不更言禮女其為禮女

自明矣正義云則非禮女也乃正義自為文不可據以改箋凡正義自為文其於注有足成亦有隳括皆取詞旨通暢不必盡與注相應

祭事主婦設羹閩本明監本毛本同小字本相臺本事作禮考文古本同案禮字是也正義可證

舍人曰萃一名萍閩本明監本毛本萍誤萍案郭爾雅與舍人本同見釋文今本有誤

江東謂之藻音瓢閩本明監本毛本同案音瓢二字當旁行細字正義於自作音者例如此

也。今按音瓢二字亦是郭注郭注不特經內字爲音即自注內難識之字亦多爲音凡古本注內云音某者俗本多刪之或刪之而僅有存者詳見爾雅校勘記舊於此云正義自作音非也

故具引之閩本明監本具誤其毛本不誤

未必伯仲處小也明監本毛本仲誤中閩本不誤

以俟迎者閩本明監本毛本俟誤候

主婦人及兩鉶鉶閩本明監本毛本同案浦鏜云衍人字以特性考之浦校是也

又解不言魚者閩本明監本毛本又誤此

知俎實男子設之者閩本明監本毛本同案此不誤浦
鐘云脫魚字非也下引特牲少牢
統解俎實不但解魚也

自祭夫氏閩本明監本毛本自誤助

孫毓以王爲長閩本明監本毛本王誤主

○甘棠

決訟於小棠之下閩本明監本毛本小誤甘

曾去小字本相臺本同案釋文去也美呂反是其本有也
字與此不同考文古本有采釋文

箋云芡草舍也小字本相臺本同閩本同明監本毛本箋
云在芡草舍也下案正義標起止云傳蔽

芡至草舍箋召伯至其樹明監本毛本依此所改也考文
古本同亦采正義又正義云定本集注於注內並無箋云
是其本自芡草舍也至敬其樹凡四十一字皆爲傳也段
玉裁以定本集注爲是

召伯所慤

唐石經小字本相臺本同案惠棟云說文無慤字當作惕今考釋文云慤本又作惕小雅苑柳大雅

民勞經皆作惕慤但惕之俗字耳釋文舊有誤今訂正詳後考證

○行露

由文王之時被化日久

明監本毛本被誤彼閩本不誤

箋云夙早也

小字本相臺本同案釋文此箋有夜莫二字云小星箋同今考此及小星箋各本皆無夜

莫二字與釋文本不同也下箋云我豈不知當早夜成昏禮與小星箋云或早或夜皆不言莫當以無者為長我將昊天有成命箋亦但云早夜陟配烝民箋有夜莫者皆釋文本耳盧文弼欲依蜀石經補此非也考文古本有夜莫也采釋文。按舊按非也依說文夕者莫也莫者日且冥也夜者舍也天下休舍也古夕與莫不同義夜與莫不同義莫謂日冥夜則該日冥至將旦言之是以穀梁春秋辛卯昔恒星不見夜中星隕如雨昔即夕字此夕與夜分別之證也然對文則別散文則莫亦為夜鄭云夜莫也者散文之義也別之也曷為別之嫌讀者謂此夜為終夜也箋

有夜莫二字者是

禮不足而彊來

小字本相臺本同案正義云禮不足而來彊暴是正義本此彊來及下彊委皆當與

序彊暴字同讀作巨良反釋文而彊來其丈反下彊委同五經文字云彊彊並巨良反云云又其兩反則皆用下字釋文與正義不同也考下彊彊委之乃左昭元年傳文當以釋文本爲長考文古本下彊委之作彊宋釋文

知始有露二月中者

明監本毛本露下衍謂字閩本刻人

此彊暴之男以多露之時

明監本毛本以誤及閩本不誤

人皆謂雀之穿屋似有角

小字本相臺本同閩本明監本毛本亦同案考文古本下有者

字云宋板同誤以傳文似有角者爲箋文也

純帛不過五兩

小字本相臺本同案此正義本也正義云此媒氏文也又云媒氏注純實緇字也古

緇以才爲聲又云則純帛亦緇也傳取媒氏以故合其字定本作紃字言合其字者媒氏作純傳亦作純於字爲合

也考媒氏純字至鄭始正其讀是此傳舊但作純當以正義本為長釋文糾側基反依字系旁才後人遂以才為屯因作純字與定本同也考文古本作純采正義釋文閩本明監本毛本作紉亦依定本改耳

周禮之圓土

明監本毛本之上衍謂字閩本刻入

天子以娉女

閩本明監本毛本娉誤聘下同

明亦以六禮委之也

明監本毛本委上衍彊字閩本刻入

○羔羊

鵲巢之功致也

唐石經小字本相臺本同案正義云是鵲巢之功所致也定本致上無所字考文古本有

采正義

羔取其贄之不鳴

閩本明監本毛本同案浦鏜云執誤贄以公羊注考之浦校是也

退食謂減膳也

小字本相臺本同案正義云定本退謂減膳更無食字考文古本膳下有食字采不正

義

故以大小釋之

閩本明監本毛本大小誤倒

絨羔羊之縫

明監本毛本縫下有也字閩本剗入案此誤補也正義引爾雅每略去也字

孫炎曰絨之爲界絨

閩本明監本毛本同案下絨字當作域釋文引作域下界絨同

因名裘縫云絨

閩本明監本毛本云誤爲

唯組紉耳

閩本明監本毛本唯誤維

行可蹤迹者

閩本明監本毛本同案傳作從正義作蹤從蹤古今字易而說之也例見前標起止

仍云至從迹可證也釋文從字亦作蹤非正義本

謂正直順於事也

明監本毛本直誤宜閩本不誤

絨縫也

小字本相臺本同案釋文絨縫也音符用反一本作絨猶縫也則當音符龍反正義云故二章解其

體言絨縫也是正義本當無猶字考文古本有采釋文

大喪飾皮車

閩本明監本毛本喪誤裘

唯麇裘素也

閩本明監本毛本麇誤麇案山井鼎云上麇字同今本考此上依王藻字下依論語

字故不同也鄭玉藻注引論語亦作麇麇是正字麇是假借魚麗傳不麇本或作麇同

若諸侯視朝君臣用麇裘

閩本明監本毛本同案浦鏗云朔誤朝下素衣麇裘諸侯

視朝之服同是也終南正義可證

其二劉等

閩本明監本毛本劉誤制

卽次錦衣為裼

閩本明監本毛本次誤以

然衮冕與衣元知不用狐青裘者

閩本明監本毛本同案十行本衣至青宛

添者一字是知字衍也

○殷其雷

勸以義也

唐石經小字本相臺本同案釋文云本或無以字下句始有考正義本云勸夫以爲臣之義下句正義云而勸以爲臣之義是其本此句當亦有以字

故先言從政勤勞室家之事

閩本明監本毛本同案此不誤浦鏜云室家當王家

誤非也勤勞句絕室家之事別爲句與下連文

此解大夫

明監本毛本解下衍行役二字閩本剗入

非雨雷也箋云

閩本明監本毛本同案箋云二字當在非雨雷也之上不知者誤移於下耳

○標有梅

男女及時也

唐石經小字本相臺本同案釋文云本或作得以及時者從下而誤正義云俗本男女下有得以二字者誤也亦謂此句非謂下句也

冰泮殺止

閩本明監本毛本同案此不誤浦鏜云內誤止非也考周禮疏載王肅引此亦作止又云

韓詩傳亦曰古者霜降送女冰泮殺止是荀卿本作止楊倞所注作內而連下文十日一御為解其說非是不當據以改正義所引也東門之楊正義引亦作止

冰泮農業起

閩本明監本毛本同案此不誤浦鏜云桑誤業非也考東門之楊正義引正作業又

周禮疏載王肅引亦作業與今家語不同不當據改也

然則男自二十九

閩本明監本同毛本然則男下剜添作自二十以及二十九案所補是也

此二十複出而脫耳浦鏜云至誤及是也

衰少則梅落少

閩本明監本同毛本則下有似字案所補是也

故可强嫁

閩本明監本毛本强誤以

故季夏去春遠矣

閩本明監本毛本同案浦鏜云故疑至字誤是也

二月綏多女士閩本明監本毛本女士誤士女案山井鼎云檢夏小正宋板爲是是也士冠禮媒氏兩疏引皆作士女所見本不同耳

下云有女懷春閩本明監本下誤士毛本不誤

禮文王世子曰閩本明監本毛本同案此不誤浦鏗云六字衍從昏義疏校非也昏義疏引之不備耳異義所據大戴禮文王世子篇也幽譜及大明正義皆有明文可證

故以禮拒之明監本毛本禮下衍正字閩本剗入

與此三章之喻大同閩本明監本毛本喻下衍時字脫之字

興者梅實尙餘七未落喻始衰也小字本相臺本同案益斯正義引標有梅云興

者喻乃隳枯此箋而非箋成文也考文古本者下有喻字采益斯正義而誤

所以蕃育民人也小字本相臺本同閩本明監本毛本民人誤人民案正義標起止云至民人又

云所以蕃育民人也皆可證其序下及後正義有作人民者卽自爲文故不與注相應

此梅落故頃筐取之於地明監本毛本落下有盡字閩本剗入案所補是也

傳不待至民人明監本毛本民人誤倒閩本不誤

○小星

能以恩惠及賤妾閩本明監本毛本及上行接字賤誤其

卽喪服所謂貴臣賤妾也閩本明監本毛本同案浦鏜云貴妾誤賤妾是也

衆無名之星小字本相臺本同考文古本同閩本同明監本毛本星誤心

以興禮雖卑者閩本明監本毛本雖作命案所改是也

知三爲星者閩本明監本毛本同案浦鏜云心誤星是也

前息燭後舉獨閩本明監本毛本獨作燭案所改是也

旒曰伐閩本明監本毛本旒作銳依今漢志也

抱衾與裯小字本相臺本同唐石經初刻裯後改裯案初刻誤也

抱衾與牀帳閩本明監本毛本同小字本相臺本衾作被考文古本同案被字是也箋承傳衾被也之文非取經衾字

○江有汜

以送爲名閩本明監本毛本名下衍也字

言姪若無姪娣猶先媵閩本明監本毛本同案此當作言若或無娣猶先姪媵用鄭士

昏禮注也

然而並流小字本相臺本同考文古本同閩本明監本毛本而誤得案正義云言江之有汜得並流此正

義自爲文不當據改

渚小洲也

小字本相臺本同案釋文云本或無此注考關雖正義云江有汜傳曰渚小洲也是正義本有

水岐成渚

小字本相臺本同案岐當作枝釋文枝如字何音其宜反又音祇考此讀如字者是也水枝謂

水之分流如木之分枝耳穆天子傳所謂枝詩讀爲其宜反又音祇義亦無大異不當遂作岐字。按江賦曰因岐成渚字作岐亦同

○野有死麕

白茅包之

唐石經小學本相臺本同案釋文云苞蒲菹反段玉裁詩經小學云苞苴苴字皆從艸曲禮注云苞苴

裹魚肉或以葦或以茅木瓜箋云以果實相遺者必苞苴之引書厥苞楠柚今書作包譌今考木瓜正義引此經作苞是正義本當亦是苞字與釋文本同此正義作包者南宋合併時依經注本改之也

先使媒人導成之

閩本明監本毛本導誤道案注作道正義作導道導古今字易而說之也

例見前釋文誘下云導也亦是改用今字非釋文本毛傳作導也考文古本傳作導采正義釋文而誤

故思以麕肉當鴈幣也

閩本明監本毛本常誤為考文載此無以字誤脫

皆可以白茅包裹束以為禮

閩本明監本毛本同小字本相臺本無包字考文古本同

案無者是也

樸橄斛橄也

閩本明監本毛本同案此不誤浦鏗云榲誤斛非也斛即榲字耳

讀為屯取肉而裹束之

閩本明監本毛本讀上行故字

玉有五德

閩本明監本毛本同案十行本玉有五剡添者一字

脫脫舒遲也

小字本相臺本同案此正義本也標起止云傳脫脫舒遲是其證正義又云定本脫脫舒

貌有貌字與俗本異釋文脫脫下亦云舒貌皆不與正義本同考文古本作舒遲貌也宋正義釋文合而一之也又云宋板同者誤

○何彼禮矣

雖則王姬唐石經小字本相臺本同案此正義本也正義云定本雖王姬無則字釋文云雖王姬一本作雖則王姬釋文本與定本同○按雖則王姬亦下嫁於諸侯十字爲一句或以王姬句絕則語病矣

亦謂諸侯主也明監本毛本主誤王閩本不誤

然土無二王閩本明監本毛本土誤上

錫面朱總毛本錫誤錫閩本明監本不誤

安車彫面鷺總閩本明監本毛本車誤居

謂以如玉龍勒之韋閩本明監本毛本同案浦鏗云王誤玉以巾車注考之浦校是也

始嫁其嫁之衣閩本明監本毛本作其始嫁之衣案所改是也十行本此行刻添者一字因行

未衍下嫁字故也其字錯在下亦誤

正王者德能正天下之王小字本同閩本明監本毛本亦同相臺本無王字案相臺本誤

也正義標起止云箋正者乃脫字耳不當據之刪去也

箋正者

閩本明監本毛本正誤王案正下當脫王字

以絲之爲綸

閩本明監本毛本同小字本相臺本之爲作爲之考文古本同案爲之是也

○騶虞

虞人翼五羆

小字本相臺本同案山井鼎云古本翼字後人旁記翼本作騶不知據何本今考此采正義云則此翼亦爲騶也之解而爲之耳非有本也

故云茁茁也

閩本明監本毛本同案下茁字浦鏗云出誤是也

多士云敢翼殷命

閩本明監本毛本同案此不誤浦鏗云翼今書作弋非也考尚書馬本作

翼見釋文鄭王本作翼見正義卽此正義所引也

應信而至者也

閩本明監本毛本同案此不誤浦鏗云德誤信非也陸機卽用毛說謂信爲母

義爲子也應者脩而致之

獻豸從兩肩爲𧢲

閩本明監本毛本同案𧢲當作麀下云肩麀字雖異音實同也可證

邶鄘衛譜

商紂畿內

明監本畿內誤變風閩本毛本不誤

在上黨沾縣大黽谷

閩本明監本毛本沾誤沾案廬文昭云在當作出是也

頓丘今爲郡名

閩本明監本毛本同案蒲鍾云郡名當縣名引證唐志是也

知者準的金滕之文

閩本明監本毛本的誤約

成王尙幼矣

閩本明監本毛本同案此不誤蒲鍾云成原文作今非也考段玉裁謂成王生時之

稱乃今文家之說見酒誥釋文然則書傳當本是成字破斧正義引書傳成王幼亦可證

其鄘或亦然矣

閩本明監本毛本其誤洪

子孝伯立

閩本明監本毛本同案浦鏜云孝誤考是也

子妻伯立

明監本毛本妻誤建閩本不誤

舜爲國名而施也

閩本明監本同毛本舜作非案所改是

五十年卒

閩本明監本毛本同案十下浦鏜云脫五字是也鄺柏舟正義所引有

迎桓公子晉於邢

閩本明監本毛本同案浦鏜云弟誤子是也

惠公復入三十三年卒

閩本明監本毛本同案下三字浦鏜云一誤考史記是也

或舉初見末

閩本明監本毛本舉誤與

綠衣莊姜傷已

明監本毛本衣下行云字閩本剝入

二十一年卒

閩本明監本毛本同案浦鏜云依年表當作二十三年是也

則伯兮宣公詩也

明監本毛本今下行亦字閩本剝入

故鄭於左方中

閩本明監本丰本主誤定案山井鼎云譜疏比比有之恐鄭所著書名也其說

非是左方者即譜之篇名君世也以旁行斜上而列於左方故正義謂之爲左方非鄭別有所著書以左方爲名也考正義原書備鄭譜於卷首其篇名君世在左方悉如鄭之舊故得指而言之今左方無之者南宋合併時所去耳

先蒸於夷姜

閩本同明監本同毛本蒸作丞案所改是也

○柏舟

汎汎流貌

小字本相臺本同案此當衍一汎字正義云言泛然而流者標起止云汎流是正義本不重泛

字釋文云汎流貌本或作汎汎流貌者此從王肅注加各本皆誤當依正義釋文正之

今不用而與物汎汎然

閩本明監本毛本與下衍衆字小字本無十行本初刻無後刻添相

臺本有衆字無而字案箋上云舟載渡物者下云今不用而與物汎汎然二物字相承不應有衆字正義云亦汎汎

然其與衆物俱流水中而已乃正義自爲文不可據添岳氏沿革例云閒有難曉解者以疏中字微足其義謂此類也然其所足要未有當者

各有威儀耳

小字本相臺本同案威儀二字當作宜考正義云此言君子望之儼然可畏解經之威也

禮容俯仰各有宜耳解經之儀也是正義本作各有宜耳也傳以畏解威以宜解儀所謂詁訓之法不知者改宜字作威儀於是此傳既威儀二字分解者而威字乃互見儀字解中矣毛氏以宜解儀之詁訓遂不復可見失之甚者也當依正義所述毛傳改正之。按舊按非也左傳威儀有分解處而大意不分毛傳皆有威儀正用左傳北宮文子言君臣父子兄弟内外大小皆有威儀也之文正義改作各有宜非也上文儼然可畏非專釋威說文義字下曰己之威儀也不專以儀釋義必連威言之凡有似分而合者如規矩亦不可分說文巨下云規巨也可證

故又陳已德

明監本毛本又下行自字闕本列入

愠怒也

小字本相臺本同案釋文愠下云怒也是釋文本此傳作怒也正義云言仁人憂心悄悄然而怨此

羣小人在於君側者也正義本怒字當是怨字縣傳云愠
恚正義云說文愠怨也恚怒也有怨必怒之所引說文作
愠怨也亦其一證

衣不澣慣辱無照察

明監本毛本衣下行之字闕本明
監本所刻添也

孝經識曰兄曰姊

闕本明監本毛本同案姊下當有月
字

日月又喻兄姊

明監本毛本無日字闕本刻去案此六
字爲一句刪去日字改讀月字屬上誤

也

○綠衣

妾上僭者謂公子州吁之母嬖而州吁驕

小字本相臺
本同案此卽

定本也正義云是公子州吁之母嬖也又云是州吁驕也
定本妾上僭者謂公子州吁之母也母嬖而州吁驕唯多
一也字耳正義本當不重母字以嬖上屬讀爲句與定本
不同考文一本有也字采正義

何時其可已止也

閩本明監本毛本已誤以

故內服注以男子之祿衣黑

閩本明監本毛本同案內下浦鏜云脫司字是也

不殊衣裳

小字本相臺本同案此定本集注也正義本無衣字考不殊裳鄭喪服注文此正義引以為說然喪服注意但說裳此箋意兼說衣裳故其文不同當以定本集注為長

女子子在室

閩本明監本毛本下子字誤于

先染絲後製衣

閩本明監本毛本同小字本相臺本製作制案制字是也正義云當先染絲而後製

衣以下盡作製字者制製古今字正義易制為製而說之其例見前非正義本箋作製字也當由不知者以正義改箋耳

先製衣而後染

閩本明監本同毛本染下剝添絲字案所補誤也製後不得復名絲矣

鄭以為言絺兮綌兮不當暑

明監本毛本不下衍以字閩本剝入案不當作本形

近之譌耳補以字者非

淒寒涼之名也

閩本明監本毛本淒誤皆

正義曰箋以上二句

閩本明監本毛本以誤云

○燕燕

陳女女娣

閩本明監本毛本同案此不誤浦鏗云弟誤娣非也正義所引世家字如此耳

此陳其得勝莊姜者

閩本明監本毛本其誤女

箋云差池其羽

小字本相臺本同案考文古本差池其羽上有于往也三字考正義經三于字上二

于為往下一于為於傳但在遠送過禮下著于於也一訓因之子于歸于往也桃夭已有傳而于飛所以興于歸其同為往自可知也箋意亦如此正義上本桃夭傳而訓為往耳非箋有于往也一訓也考文古本采正義而誤

釋鳥舊周

明監本毛本鳥下衍云字閩本剋入

此燕卽今之燕也

閩本明監本毛本同案此燕下浦鏜云脫一燕字是也爾雅疏卽取此正

重燕字

尾涎涎是也

閩本明監本毛本同案涎當作涎形近之調。按漢書及諸韻書皆作涎以韻言則

寔電亦音之轉

往飛之之貌

明監本毛本不重之字閩本剝去案上之字乃時字之誤正義上下文可證輒刪者

非也

聲有大小

小字本相臺本同閩本明監本毛本小大作大誤也案上正義云故以大小其音喻言語大

小者以白爲文故與經下上箋小大皆倒也不當據改又雄雉箋亦作小大可證

實勞我心

相臺本下有實是也乃釋文誤遺○耳餘本皆不誤考文古本有非也

塞瘞

小字本相臺本同案正義云定本任大之下云塞瘞也俗本塞實也正義本從俗本故云其心誠實而深

三言必足才甚言一
遠也不更說瘞字釋文云瘞崔集注本作實考定之方中
塞字無傳而箋云塞充實也常武箋云自實滿本此傳也
當以集注正義本爲長定本釋文本作瘞者卽說文之瘞
字○段玉裁云瘞者幽薶也與充實義正同非有二訓也
謂卽心部瘞字非是瘞者靜也義殊

孝友睦姻任恤
小字本同閩本明監本同相臺本姻作嫻
毛本同案姻字是也此箋用漢時今字與
周禮經古字不同也相臺本毛本所改皆非是

姻親於外親
毛本姻誤嫻閩本明監本不誤

記古書義又且然
閩本明監本毛本同案浦鍾云旣誤
記考南陔正義是也且當作宜南陔

正義引作當

○日月

以至困窮之詩也

唐石經小字本相臺本同案此釋文本也
正義云俗本作以致困窮之詩者誤也釋

文云以至困窮之詩也舊本皆爾俗本或作以至困窮而作是詩也誤正義釋文所說相反正義本標起止云至困窮與各本不同今無可考考文古本作以至困窮之故作是詩也采釋文或作本而有誤

言日乎以照晝

閩本明監本毛本平下有日字案所補是也

顧下章傳亦宜倒讀

明監本毛本願誤故閩本不誤

不循不循禮也

小字本相臺本同考文古本同閩本明監本毛本上循字作述案山井鼎云箋中毛

傳作循似是考凡鄭箋皆箋傳而非箋經循字是矣

○終風

見侮慢而不能正也

唐石經小字本相臺本同考文古本同閩本明監本毛本脫而字

且其閒有暴疾

明監本毛本閒下衍又字閩本刻入

在我莊姜之傍

閩本明監本毛本同案注作旁正義作傍旁傍古今字易而說之也例見前餘

同此

中心是以悵傷

閩本明監本毛本悵作悼案所改是也

浪意明也

閩本明監本毛本明誤萌案爾雅疏即取此正作明。按此當作萌為是舍人意浪讀為

蒼筤竹之筤易正義曰竹初生之時色蒼筤取其春生之美也凡意蕊心花初生時似此故舍人曰浪意萌也作明者誤韓詩云起也正是意萌之訓謂如波之起也

雖來復侮慢之

閩本明監本毛本侮誤悔

願言則嚏

唐石經小字本相臺本同案釋文云韋本又作嚏又作嚏舊作利反又丁四反又豬吏反或竹季反

劫也鄭作嚏音都麗反段玉裁云毛作嚏路也鄭云嚏讀為不敢嚏咳之嚏此鄭改字唐石經以下經傳皆從口是用鄭廢毛嚏不得訓路明矣今考正義本傳是路也則其經當是嚏字釋文韋即嚏之變體狼跋釋文韋本又作韋可證也與說文止部之韋字迥不相涉若經字作止部之韋鄭不得讀為嚏釋文亦不當作竹利等反矣經義雜記云案釋文知崔

靈恩集注作連陸氏從之正義則從王肅作寔釋文云一作寔者即王本也其說非是由誤讀釋文為從止之連所致也

噓哈也

小字本相臺本同案噓當作寔又此正義本也正義云王肅云願以母道往加之則噓劫而不行哈

與劫音義同也定本集注並同釋文云劫也本又作哈孫毓同崔云毛訓連為坎今俗人云欠欠坎坎是也不作劫字人體倦則伸志倦則坎考此傳本與狼跋同王肅孫毓作劫崔靈恩作坎皆非是當以正義本為長

終風至則噓

閩本明監本毛本同案此標起止及下云我則噓哈而不行又標起止云傳噓哈又

云噓劫而不行凡四噓字皆當作寔正義舊是寔字不知者以噓噓字亂之耳

寢言不寐

小字本相臺本同唐石經初刻寐言不寢後改同今本案初刻非也

言我夜覺常不寐

閩本明監本毛本常誤恒

○擊鼓

伐鄭在魯隱四年

小字本同閩本明監本毛本亦同相臺本隱下有公字考文古本同案無者是

也正義標起止云至隱四年及以下正義文皆可證

則吁爲首

閩本明監本同毛本則作州案州字是也

戎事非輕於力役

閩本明監本毛本役下衍也字

箋云子仲字也

小字本相臺本同考文古本同閩本明監本毛本脫子字

祭兵于山川

閩本明監本毛本于誤於

與之約誓

小字本相臺本同案釋文云與之約一本作與之約誓考正義云殷勤約誓是其本當與一本

同

欲相與從生死

明監本毛本生下衍至字閩本剝入

故吁嗟歎之

小字本相臺本同閩本明監本毛本亦同案吁當作于騶虞氓兩箋皆作于是其證也

乖闊䟽遠

明監本毛本闕下衍與字閩本剝入

○凱風

而成其志爾

唐石經小字本相臺本同案正義云俗本作以成其志以字誤也定本而成其志考文古本作

以采正義

此與孝子之美

閩本明監本毛本與誤舉

不得安母之心

閩本明監本毛本得誤能

棘難長養者

段玉裁云棘下當有心字棘心棘之初生者故難長養下章云棘薪則其成就者矣語勢

正相對也

有叡智之善德

閩本明監本毛本同案注作知正義作智知智古今字易而說之也例見前釋

文知本亦作智非正義本餘同此

○雄雉

而作是詩小字本相臺本同唐石經初刻無此四字後改有案有者是也正義標起止云至是詩可證○按據標起止為證乃是正義所據本耳他本之有不同者不必皆正義取據也全書以此例之

齊莊公通於崔杼之妻閩本明監本毛本齊誤蘇

夫人為夷姜閩本明監本毛本為誤謂

我之懷矣自詒伊感閩本明監本毛本同案伊當作繫正義引此傳之繫及小明之伊以

明鄭所以易伊為繫也作伊則與下小明無別不知者所改耳

箋云日月之行閩本明監本毛本同小字本相臺本日上有視字案有者是也正義云言我視彼日

月之行即本箋為說也考文古本有我視二字采正義而有誤

事君或有所留閩本明監本毛本同小字本相臺本事作而案而字是也

○匏有苦葉

由膝以上為涉

小字本相臺本同案正義標起止同云今定本如此是舊本不如此今無可考釋文

以上時掌反下皆同謂由帶以上由軔以上也其與定本同異亦無可考

以衣涉水為厲謂由帶以上也

小字本相臺本同案正義標起止同云今定本如此

是舊本不如此今無可考段玉裁云定本出於小顏恐屬肌改當作以衣涉水為厲由帶以上為厲爾雅不為一訓毛並存之

揭褰衣也

小字本相臺本同案正義標起止同云今定本如此釋文云揭揭衣一本作揭褰衣定本與釋

文一本同考揭揭衣毛用爾雅文當以釋文本為長

故詩曰幡幡瓠葉

閩本明監本毛本瓠誤匏

不禮乃可度世難無禮將無以自濟

閩本絀難無二字明監本毛本誤不

行案此讀當於難字斷句無字下屬明監本毛本以意補非也

傳曰賢女妃聖人

閩本明監本毛本同案浦鏗云箋誤傳是也此自正義誤以箋為傳耳非

字誤也

濟盈不濡軌

小字本同相臺本軌作軌閩本明監本毛本同唐石經作軌案釋文云軌舊龜美反謂車轉頭

也依傳意宜音犯案說文云軌車轍也從車九聲龜美反軌車軾前也從車凡聲音犯車轉頭所謂軾也相亂故具論之是釋文本字作軌但以爲宜作音犯字正義云說文云軌車轍也軌車軾前也然則軾前謂之軌也非軌也但軌聲九軌聲凡於文易爲誤寫者亂之也是正義本字亦作軌但以爲寫者亂之故不從軌而從軌以爲說由此考之唐石經以前經字未有直作軌者也戴震毛鄭詩考正依韻定從軌字段玉裁同詳見下相臺本依釋文小字本及此十行本皆然其作軌者即軌字非軌字乃當時俗體也釋文軾字舊誤今訂正詳後考證

由輶以上爲軌

小字本同相臺本作軌見上餘同案段玉裁云古者輿之下兩輪之間方空處謂之

軌高誘注呂氏春秋云兩輪間曰軌此以廣狹言之凡言度涂以軌謂此毛傳曰由輶以下爲軌此以高下言之凡

言濡軌滅軌謂此穀梁傳曰車軌塵謂以軌之高廣節塵之高廣中庸車同軌亦謂車制高廣不差軌亦云轍轍者通也其中通也近人專以在地之迹謂之軌轍古經不可解矣不云由輿以下者水深至於輿下軸上之輈則必入輿矣故以輿下之輈為高下之節喻禮義之不可過也自下誦為上乃議改軌為軌釋文舊龜美反則唐以前本不誤也今考釋文本已誤作上讀時掌反見前由膝句以上字音中

必濡其軌今言不濡軌

閩本明監本毛本二軌字作軌案此二字皆當作軌正義從軌

字以為說故自為文直改云軌也

今雌雉鳴也

閩本明監本毛本同案浦鐘云鳴當鳥誤是也

乃媚悅為子之公

閩本明監本毛本公誤容

以假人以辭

閩本明監本毛本上以字作似案似是也

軌車軾前也

閩本明監本毛本軌作軾案所改是也以

下軌字同者不更出

祭左右軌范乃飲

閩本明監本毛本軌作軌案所改非也下軌與軌又少儀注云軌與軌又

軌當大馭之軌及此凡四字皆當作軌閩本以下一例改爲軌失之又下其實少儀軌字一處閩本明監本作軌是毛本作軌非

書或爲軌元謂軌是軌法也

閩本明監本毛本三字皆作軌案此當作書或爲軌

元謂軌是軌法也各本皆誤今周禮注下軌字亦作軌依段玉裁漢讀考訂

謂與下三面之材

閩本明監本毛本同案浦鏗云輿誤與以周禮注考之是也

考功記注

閩本明監本毛本同案浦鏗云工誤功是也

鴈者隨陽而處

小字本相臺本同案此定本也正義云定本云鴈隨陽無陰字是正義本有陰字作

鴈者陰隨陽而處考箋下云似婦人之從夫正義云此皆陰陽並言謂下句並言婦人與夫上句宜並言陰隨陽也當以正義本爲長

注云謂羔鴈也

閩本明監本毛本謂誤納

故爲爲日出

閩本同明監本毛本故誤大爲誤所案此當作故爲日始出

日未出已名爲所生

閩本明監本毛本同案生當作矣形近之譌

此皆陰陽並言

閩本明監本毛本並誤并

定本木鴈隨陽

閩本明監本毛本同案木當作云形近之譌

日用所者

閩本明監本毛本日誤耳

○谷風

蔓菁與菑之類也

小字本相臺本同案釋文云菑音福本又作菑音富正義云蔓菁與菑之類者

是亦作菑也考文古本作菑采釋文又作本

陳楚謂之薺

閩本明監本毛本薺誤薺

關西謂之蕪菁閩本明監本毛本同案此不誤西上浦
鏗云脫之東二字非也正義所引方言
皆不備

趙魏之部閩本明監本毛本同案浦鏗云郊誤部考方
言是也

生下溼地毛本溼誤涇閩本明監本不誤案此正義順
彼文故作溼他正義則用濕改爲溼者誤

陸機云菲似營閩本明監本毛本當誤菑

箋云徘徊也閩本明監本毛本同小字本相臺本云下有
違字考文古本違字亦同案有者是也

言君子與己訣別小字本同閩本明監本毛本亦同相臺
本訣作決案釋文云訣本或作決相臺

本依改以爲決正訣俗也考訣字說文在新附而文選注
引通俗文已有之可不煩改相臺本非也

送我裁於門內小字本相臺本同案釋文云裁於門內一
本作裁至於門又一本作裁至於門內正

義本今無可考山井鼎云古本一本於上補至字不知據
何本者卽采釋文

宴爾新昏

唐石經小字本相臺本同案釋文云宴爾本又作燕考文一本作燕下同采釋文又作本

湜湜其沚

唐石經小字本相臺本同案釋文云其沚音止正義本未有明文說文水部湜下引詩曰湜湜其止

段玉裁云毛作止鄭作沚今考鄭箋但義從沚耳其經字不作沚也釋文唐石經及各本皆誤見下

小渚曰沚

小字本相臺本同案此鄭以經止字爲沚字之假借不云讀爲而於訓釋中直改其字以顯之

也例見關雎怨耦曰仇下此實漢代注經之常例而後來往往有依注改經者此經釋文本已誤矣經義雜記云以止爲沚起於北宋又云此因經誤作沚又於箋首增小渚曰沚四字於釋文加其沚音止四字其說皆非也關雎正義引此箋小渚曰沚安得以爲增乎因不得箋改字之例而誤也今訂正

故見渭濁

小字本相臺本同案釋文云舊本如此一本渭作謂後人改耳考此箋云故見謂濁下云故謂

已惡也二謂字義同正義云涇水言以有渭故人見謂已濁猶婦人言以有新昏故君子見謂已惡也見謂濁言人見謂已涇之濁是正義本亦作謂當以一本爲長又云定本涇水以有渭故見其濁此定本之誤正義所不從而毛

言部 居正六經正誤反以爲是失之矣考文古本作其采正義
一本作見其清濁則更誤正義見謂字凡四下二謂字譌
作渭今改而正之見下

母發我笱

唐石經小字本相臺本同案釋文以無發我笱作
音考正義引角弓箋及說文母字爲說是正義本

作母也考唐石經小弁經作無乃是經中用字不畫一當以
正義本爲長○按以儀禮古文作無今文作母例之毛詩多
古文則作無是也正義本作母未是

諭禁新昏也

小字本同閩本明監本同相臺本諭作喻毛
本同案喻字是也正義云是喻禁新昏無乃

之我家也上文又云以興禁新昏汝無之我家喻卽興也
諭字形近之譌耳考文一本采此而改上文喻皆作諭其
餘亦二字不別誤

由新舊並而善惡別

閩本明監本毛本並誤并

言人無之我魚梁

閩本明監本毛本同案經作母注同
正義作無母無古今字易而說之也

例見前餘同此。按謂無母古今字可也。謂母無古今字不可。

東南至京兆陵陽

閩本明監本毛本同案浦鍾云陽陵字誤倒考漢志是也

此以涇濁喻舊至

閩本明監本同毛本至作室案室字是也六經正誤引作室

見渭濁言人見渭已涇之濁

閩本明監本毛本同案浦鍾云謂並誤渭是也六經

正誤引作謂

其制敝人掌以時敝爲梁

閩本明監本毛本其誤周

喻禁新昏無乃之我家也

閩本明監本毛本乃誤令

象有姦之者禁令勿姦

明監本毛本姦誤姦閩本不誤案說文母下作奸是也五經文

字母下作姦非奸犯也。按段玉裁云依說文者姦也姦者么也母下云从女有姦之者大禹謨正義引不誤若奸訓犯姦也與姦義有別

言海國校勘言 卷一
況我於君子家之事難易乎

小字本相臺本同閩本同明監本毛本家之作之家案所

改是也考文古本作家事之一本亦作家之事

何所貧無乎

閩本明監本毛本同案經傳箋皆作亡正義作無亡無古今字易而說之也例見前

注云舟謂集板如今自

閩本明監本毛本同案自當作舩易注本如此故正義引以說

今日舩也王應麟輯鄭易即采此其誤亦同

惴養也

小字本相臺本同案正義云偏檢諸本皆云惴養孫毓引傳云惴與非也釋文云毛興也鄭驕也王

肅養也說文起也據此則養也是王肅本也段玉裁云說文起即興正義從養非

賈用不售

小字本相臺本同唐石經售字磨改案錢大昕唐石經考異云益本作讎段玉裁云讎正字售俗字

史記漢書尚多用讎今考釋文售布救反是釋文本作售石經磨改所從也

阻難云

小字本同相臺本云作也閩本明監本毛本同案也字是也已見雄雉傳此與之同

昔育恐育鞫

唐石經小字本相臺本同閩本明監本毛本亦同案詩經小學云顧寧人曰唐石經自采芑節

南山蓼莪之外並作鞫今但公劉瞻卬二詩從之餘多俗作鞫段玉裁案采芑節南山蓼莪其字皆當作鞫今考經中用字例不畫一其用鞫字者假借也仍以唐石經爲正又案此經蜀石經無下有字誤也以傳箋正義考之皆當有蜀石經之不可信每類此

難易無所辟

相臺本同閩本明監本毛本亦同小字本辟作易案易字誤也釋文以無辟作音正義標

起止云至所辟是此正義本也釋文本無所字

○式微

鄭以式爲發聲

閩本明監本毛本爲誤微

言君今在此皆甚至微

明監本毛本今誤公閩本不誤

固當不憚淹恤

明監本毛本固誤故閩本不誤

○旄丘

宣公以魯桓二年卒

閩本明監本毛本同案二上浦鏜云脫十字是也

又曰千里之外設方伯

明監本毛本日誤因閩本不誤

若主五等諸侯

閩本明監本毛本主誤王

是天子何異乎云夾輔之有也

閩本明監本毛本同案浦鏜云乎當何字誤是

也

如葛之蔓延相連及也

相臺本同閩本明監本毛本亦同小字本延作莚案釋文葛延以戰

反又音延小字本依釋文也考毛葛覃野有蔓艸葛生傳延字皆不從艸此傳當同鄭葛覃箋及旱麓箋亦然釋文延字皆無音唯此有是其本此延字誤加艸也此正義有三延字皆不從艸是正義本作延延字是矣考文古本作莚采釋文又考蔓字亦當衍葛覃傳云覃延也葛生傳云葛生延而蒙楚皆單言延野有蔓草傳釋蔓云延也是蔓

卽延故不重言也鄭箋有延蔓而蔓在延下芄蘭箋今本有蔓延依釋文是後人輒加然則此傳亦後人輒加也正義三言延蔓乃自爲文凡單注言延及單言蔓者正義皆得重言延蔓而說之

以當蔓延相及

閩本明監本毛本同案此當作延蔓誤倒之耳下文二延蔓可證

二者別設其文

明監本毛本二上衍言字閩本刻入

形貌蒙戎然

小字本同相臺本戎作茸案釋文蒙如字徐武邦反戎如字徐而容反云徐此音是依左

傳讀作厯茸字正義引左傳依此經作蒙戎是此箋正義本釋文本皆作蒙戎相臺本改戎爲茸誤也閩本明監本毛本亦作戎

狐裘蒙戎杜預云蒙戎亂貌

閩本明監本毛本同案此不誤浦鏜云傳作厯茸非

也凡正義引羣籍有順經注爲文不與本書同者此類是矣當各仍其舊

始而愉樂

小字本相臺本同案此定本也正義云定本愉樂作愉樂上文云言汝等今好而苟且爲樂以

苟且訓偷其正義本作偷也又上文云以興衛之諸臣始而偷樂今作愉者誤釋文愉以朱反與定本同此傳愉樂與微弱對文愉樂主言好不取苟且為義正義本非是

○簡兮

仕於伶官

小字本同閩本明監本毛本同唐石經伶作冷相臺本同案釋文云冷官音零字從水樂官也字亦

作伶正義標起止云箋伶官至伶官其上下文伶字盡同此箋言冷氏世掌樂官正義引伶倫氏伶州鳩以為說考左昭二十年冷州鳩釋文云冷字亦作伶漢書志冷淪及人表冷淪又呂覽同皆用從水字廣韻冷又姓此序及箋當本作冷其作伶者俗字耳正義亦當本是冷字或後人改之也五經文字云冷樂官或作伶訛亦其證

伶人告縣

閩本明監本毛本同案浦鏗云和誤縣考國語是也

當萬舞也

小字本相臺本同閩本明監本萬誤為毛本不誤

萬舞干羽也

閩本明監本毛本同小字本相臺本羽作舞考文古本同案羽字誤也以干羽為萬舞是

毛義萬舞爲千舞籥舞爲羽舞鄭所易也正義有明文又標起止云箋簡擇至于舞亦可證不知者乃順上傳改此箋耳

故云用之宗廟山川

明監本毛本用誤周閏本不誤

則謂一日之中

明監本毛本則下衍樂字閏本剋入

則亦爲大德也

明監本毛本則誤當閏本不誤

可以御亂

小字本相臺本同案正義云御治也謂有侵伐之亂武力可以治之定本作御字如其所言非

爲異本當有誤也今無可考意必求之或定本御作禦

渥厚漬也

小字本相臺本同案此正義本也云定本渥厚也無漬字考釋文渥下云厚也亦無漬字故下

不爲漬字作音釋文本與定本同也

祭有舁韞胞翟闔寺者

閏本明監本毛本韞誤燿案序下正義兩韞字可證依此正義

本傳當作韞字釋文云輝字亦作韞者是也其引祭統乃順彼文作輝耳

故於祭末乃是賜也閩本明監本毛本是誤見

其子小似柿子閩本明監本毛本同案浦鏗云橡誤柿是也。按一本作似杵子杵卽狙公試

芋字之或體非機杵也杵誤而爲柿耳芋卽橡也

○泉水

思之至也

小字本相臺本同案正義云雖非禮而思之至極也君子善其思故錄之也定本作思字如其所言非爲異本當有誤也釋文云一本思作恩或定本如此但未有明文明監本毛本作定本作恩字用釋文改耳

閩本不改

無日不思也

小字本相臺本同閩本明監本毛本無上行我字十行本初刻無後刻添考正義云故我

有所至念於衛無一日而不思念之也是箋本無我字刻添者非也

故我有所至念於衛

明監本毛本故誤然閩本不誤

言我思欲出宿於沛

閩本明監本毛本沛誤姊

舍輶卽釋輶也

閩本明監本毛本釋輶誤倒

止陳車騎

閩本明監本毛本止誤上

然則輶山行道之名也

閩本明監本毛本同案浦鏜云道衍字以聘禮注考之是也

士喪禮有毀宗躋行

閩本明監本毛本同案浦鏜云士衍字以聘禮記注考之是也

故爲由遠親親

閩本明監本毛本由誤申

干言所適國郊也

小字本相臺本同案上章正義云下傳或兼云干言所適國郊者一郊不得兩

地宿餞不得同處衍字耳定本集注皆云干所適國郊是定本集注正義本皆無言字不當依或本也

我還車疾於衛而返

小字本同相臺本疾下有至字閩本明監本毛本同十行本初刻無後宛

三言注疏卷一
添案無者是也此箋而返二字卽申傳至字之意若疾下有至字則而返二字無所施矣相臺本非也

出宿至有害

閩本明監本毛本誤作出宿于干至瑕有害

○北門

刺仕不得志也

唐石經小字本相臺本同案正義云不知士有才能又云言士者有德行之稱其仕爲官

尊卑不明也是正義本仕當作士字

摧沮也

小字本相臺本同案正義云則乖沮已志定本集注皆云摧沮也標起止云傳摧沮如其所言非爲

異本當有誤也今無可考意必求之或定本集注作摧阻也

則乖沮已志

毛本乖誤乘閩本明監本不誤

故以爲摧爲刺譏已也

閩本明監本毛本同案浦鏜云爲摧當摧我誤是也

○北風

莫不相攜持而去焉唐石經小字本相臺本同案正義云莫不相攜持而去之正義自爲文也標起
止云至去焉可證考文古本有之字采正義而誤

虛虛也

小字本相臺本同案此釋文本也釋文云虛虛也一本作虛徐也正義云但傳質詁訓疊經文耳非

訓虛爲徐是正義本當是虛徐也與釋文一本同標起止云傳虛虛或合併經注正義時所改也段玉裁云經文作邪鄭始易爲徐毛意虛邪如管子之志無虛邪耳虛虛也者謂此上虛字卽空虛字也正義本非○按古之訓詁有此一例如易大傳比者比也剝者剝也蒙者蒙也說文亦云已者已也經傳不可枚數或疑毛傳內無此因舉要之襍之傳曰要褻也毛公時安得有褻字褻本作要謂此要非人要領之要乃衣裳之要也正與此虛虛也一例古者虛本訓上虛因之訓空虛嫌其義之不可定也故釋之曰此上虛字其義則空虛也如易蒙者蒙也謂此蒙艸名之字其義則訓蒙覆也

而雪害物

明監本毛本而誤兩闕本不誤

承惠好之下 閩本明監本毛本承誤亟

霏甚貌 毛本霏誤靡明監本以上皆不誤

○靜女

言志往而行正 小字本同閩本明監本毛本亦同相臺本
正作止考文古本同案正字是也終風箋

云正猶止也言正足包止義不必與往字對文相臺本非也

然後可保育也 閩本明監本毛本可下衍以字

使妃妾德美也 明監本毛本德誤得閩本不誤

定本集注云女吏皆作女史 閩本明監本毛本同案此
云字當衍

其信美而異者 小字本相臺本同案正義說箋云信美而
異於衆草又云定本集注云信美而異者

是正義本不與定本集注同也但未有明文今無可考考
文一本美作善未見所出

非爲蕘徒說美色而已小字本相臺本蕘作其閩本明監本毛本亦同案其者其經女字也
唯十行本作蕘是誤字

○新臺

故不能俯也小字本相臺本同考文古本同閩本明監本毛本俯下衍者字

○二子乘舟

汎汎然迅疾而不礙也小字本相臺本同案正義云汎汎然迅疾而不礙釋文云駛疾所吏反本或無駛字一本作迅疾正義本與一本同

見其影之去往而不礙閩本明監本毛本同案經作景正義作影景影古今字易而說之也例見前餘同此

云壽盜其白旄而先閩本明監本毛本旄作旌

不瑕有害小字本相臺本同唐石經初刻遐後改瑕案初刻非也此經瑕字毛遠也以瑕為遐之假借鄭則如字讀之故易為過也泉水經同其釋文可證也汝墳天保南山有臺等經用遐字者即不畫一之例

○柏舟

故作是詩以絕之小字本相臺本同唐石經初刻之下有也字後磨去考文古本有案古本非據唐石經但其本每多也字而偶合

卽下云至死矢靡他是也閩本明監本毛本同案經傳作

說之也例見前此不誤浦鍾云之誤至非也傳之至也至己之死信無它心正義取此

端鞞紳搢笏閩本明監本同毛本鞞誤鞞

蓋亦衣不端矣閩本明監本毛本同案浦鍾云不當元誤是也

纓而結其條閩本明監本毛本纓誤綏

之死矢靡慝小字本相臺本同案盧文弨云唐石經初刻慝作匿誤後改從今本考傳慝邪也釋文慝他得反皆可證也

○牆有茨

此注刺君

閩本明監本毛本注作註案皆誤也浦鏜云註當主字誤是也

茨蒺藜也

小字本同閩本明監本毛本同相臺本蒺作藜案藜字是也釋文藜音梨正義今上有蒺藜之

草皆可證

今上有蒺藜之草

閩本明監本毛本蒺誤藜餘同此

君本何以不防閑其母

閩本明監本毛本誤奈

內蕒箋內蕒

閩本明監本毛本箋上行○

○君子偕老

今夫人有淫佚之行

閩本明監本毛本佚誤佚下同

行可委曲蹤迹也

小字本相臺本同考文古本同閩本明監本毛本蹤誤縱案此傳當作從與羔

羊傳字同釋文委委下云行可委曲蹤迹也乃易爲今字耳非釋文本此傳作蹤也羔羊傳釋文云從字亦作蹤可證

何謂不善乎

閩本明監本毛本同小字本相臺本何作可案可字是也正義云可謂不善云如之何乎

又云可謂不善言其善也是其證

次第髮長短

明監本毛本短下有爲之二字閩本列入案此誤補也正義不備引耳雞鳴正義引

有

唯祭服有衡筭

閩本明監本毛本同案此不誤浦鍾云衍筭字非也陳啟源毛詩稽古編云衡

筭本周禮天官追師文傳引其成語耳非合衡筭爲一物也衡垂於當耳筭橫於頭上彼注云王后之衡筭皆

以玉爲之唯祭服有衡垂於副之兩旁當耳其下以統懸瑱笄卷髮者是衡笄本二物也孔疏引之乃云唯祭服有衡笄垂於副之兩旁云云於衡下增一笄字而不引笄卷髮者是以釋衡者釋笄矣今考陳此說是也陳又云案大雅追琢其章疏引追師注衡下無笄字安知此疏非傳寫之誤其說非也此笄字是正義增之故不備引笄卷髮者所以傳合傳文也下云編次則無衡笄亦可證不得以大雅正義例之

以玉珈於笄爲飾

閩本明監本毛本同案珈當作加下云珈之以言加者是也

李巡曰寬容之美也

閩本明監本毛本同案浦鏜云皆誤寬是也爾雅疏卽取此正作皆

傳意陳善以駁宣姜

閩本明監本毛本駁作駁下同

玼兮玼兮

唐石經小字本相臺本同案釋文云玼音此引沈云毛及呂忱並作玼解王肅云顏色衣服鮮明貌

本或作瑳此是後文瑳兮王肅注好美衣服潔白之貌若與此同不容重出今檢王肅本後不釋不如沈所言也然舊本皆前作玼後作瑳字段玉裁云玼一作瑳後人乃分別二章三章今考陸氏之意不以沈爲然但舊本皆爾故不定爲一

字正義本標起止玼兮至如帝後章璫兮至媛也與釋文本同周禮內司服釋文云玼音此劉倉我反本亦作璫與下璫字同倉我反此玼璫一字之證

其之翟也

唐石經小字本相臺本同案釋文榆字又作榆狄本亦作翟狄在榆下明是傳字非經字也經字無

作狄者考文古本經傳皆作狄采釋文而有誤

揚且之皙也

小字本同閩本同明監本毛本皙誤皙唐石經相臺本作皙案皙字是也五經文字云皙相承

多從日非說文皙人色白也从白析聲皆在白部可證釋文當亦本作皙今誤詳後考證

非由衣服之盛

明監本毛本由誤有閩本不誤

言己髮少

閩本明監本毛本己誤人

因以爲飾名之掄

明監本毛本之下有日字閩本列入案所補是也

取其填實也

閩本明監本毛本填誤填案填字是也依此上二填實及言瑱爲瑱凡四字皆填之

誤

其以類根配

閩本明監本毛本根作相案所改是也

黑帝其名汁光紀

閩本明監本毛本汁誤汴

展衣夏則裏衣綢締

小字本相臺本同案正義云定本云展衣夏則裏衣綢締俗本多云冬衣

展衣蓋誤也釋文云冬衣於既反著也下裏衣同與俗本

同考文一本有冬則衣三字采正義釋文而有誤

此以禮見於君

小字本相臺本同案釋文云於君子一本無子字正義云又解展衣所用云此以禮

見於君及賓客之盛服是正義本無子字也考鄭內司服

注云展衣以禮見王及賓客之服此諸侯夫人故變文言

君與葛覃傳進見於君子對朝事舅姑者不同或因經首

君子字而誤衍當以一本為長考文古本有子字采釋文

禮記作禮衣

小字本相臺本同案此正義本也正義云是禮記作禮衣也定本云禮記作禮無衣字當

以定本為長

揚廣場而顏角豐滿小字本相臺本同案段玉裁云傳當本作揚且之顏者廣場而顏角豐滿
自引經附傳而傳之複舉經文者往往刪去故此傳割裂
而不可通今考正義標起止云傳清視至廣場是其本已
如此讀以揚字逗廣場句絕也卷首鄭氏箋下正義云未
審此詩引經附傳是誰為之可知毛為詁訓與經別行者
正義所不見也

以為媛助也

小字本同閩本明監本毛本同相臺本媛作媛考文古本同案媛字是也正義引爾雅孫

炎注云君子之援助然是其證也以援解媛所謂詁訓之法亦見說文媛字下

是當暑繼去袷延烝熱之服也

閩本明監本同毛本烝作蒸案烝即蒸字耳餘

同此

言是當暑袷延之服者

閩本明監本毛本者誤諸

祿者實祿衣也

閩本明監本毛本同案祿者當作綠衣者見綠衣序下正義今周禮注作祿亦

誤字

中喪禮爵弁服皮弁服之下

閩本明監本毛本同案浦鏜云士誤中是也

因名眉目曰揚

閩本明監本毛本同案浦鏜云目疑衍字是也

旣名眉爲揚目爲清明

閩本明監本毛本同案浦鏜云明疑衍字是也

此及猗嗟傳云揚廣

閩本明監本毛本同案廣下浦鏜云脫揚字是也

因顏色依爲美女

閩本明監本毛本同案依當作已此說箋意謂卽使不言媛而顏色已爲

美女故媛當爲援助也

○桑中

政散民流而不可止

唐石經小字本相臺本同案正義云定本云而不可止止下有然字標起止云

至不可止是正義本無然字考文古本有采正義

刺男女淫怨而相奔也

閩本明監本毛本同案浦鏜云亂誤怨是也

期我於桑中

閩本明監本毛本同案十行本期我於剗添者一字是我字衍也此但說期不取我

字

以其言由公惑淫亂

閩本明監本毛本同案浦鏜云室誤惑是也

有是惡行

小字本相臺本同案釋文行也下孟反箋同是其本此傳有也字與此不同考文古本有采釋

文

孟姜列國之長女

小字本相臺本同案釋文云列國之女一本作列國之長女正義云言孟故知

長女與一本同

故陳其辭以刺之

閩本明監本毛本辭誤詞

釋草又云蒙王女

閩本明監本毛本又誤文王誤玉下二王女同案今爾雅作玉者亦誤

下孟□□孟弋孟庸閩本明監本毛本作下孟弋孟庸案此十行闕二字閩本以下輒改者非

○鶉之奔奔

言其居有常匹小字本同閩本明監本毛本同相臺本脫其字案正義云定本集注皆云居有常匹則為俱者誤也此與定本集注同

刺宣姜與頑非匹偶小字本相臺本同閩本明監本毛本偶作耦案所改是也正義標起止云至匹耦凡箋匹耦字皆從未正義亦然偶字誤餘同此

○定之方中

衛為狄所滅唐石經小字本相臺本同案釋文云衛為狄所滅本或作狄人一本作衛懿公為狄所滅非也正義云是為狄所滅之事又云故為狄所滅懿公時也皆指序而言是正義本與釋文同其自為文則多言狄人非其本

有人字也考序於此及載馳木瓜凡三言狄人文例宜同當以有者為長考文古本作衛懿公為狄人所滅采釋文而合兩本為一

國家殷富焉

小字本相臺本同案盧文昭云唐石經初刻作矣後改焉考正義標起止云至富焉初刻非也

戰于熒澤而敗

小字本相臺本同閩本同明監本毛本熒作榮案釋文熒迴丁反考周禮左傳與此

同字皆作熒唯尚書釋文作榮榮字誤也此正義當本亦是熒字今作榮者或合併以後改之耳餘同此

而首章作于楚宮

閩本明監本毛本而誤即

杜預曰君死國散

閩本明監本毛本散誤敗

其在縣東

閩本明監本毛本同案浦鏜云在其誤倒是也

宋桓公逆諸河霄濟

閩本明監本毛本同案浦鏜云霄誤霄是也考沿革例載杜昭二十

年注霄從公故字與此同皆形近之譌

作于楚宮

唐石經小字本相臺本同案正義云作為楚丘之官也下句同考此乃正義說經之義耳非其本經

字作為也序下正義云而首章作于楚宮作于楚室可證詩經小學云案喪大記注云為或作于聲之誤也李善文選注引作為楚宮作為楚室所謂以破引之考文古本作為采正義

其體與東壁連

相臺本同小字本壁作辟闔本明監本毛本壁誤壁案辟字是也釋文辟音壁正義

云由其體與東壁相成辟壁古今字易而說之也例如此耳非正義本作壁也考壁字古作辟左傳辟司徒是其證爾雅釋文云辟本又作壁此星有人居之角象宜為壁其說非也考文古本作壁采正義而誤闔本以下正義中壁皆誤壁○按周禮注辟宿字亦作辟古多用辟

椅梓屬

小字本相臺本同案正義云故以椅桐為梓屬又云定本椅梓屬無桐字於理是也標起止云傳椅

梓屬當是脫桐字也考文古本有采正義

言豫備也

小字本相臺本同考文古本同闔本明監本毛本豫誤預案預字在說文新附徐氏曰經典通

用豫從頁未詳是也閩本以下正義中豫亦誤預

而作楚丘之居室

閩本明監本毛本同案作下脫爲字上文可證

疑在今東郡界今

閩本明監本毛本下今字作中案所改是也

姬觶之口鄭則口開方

閩本明監本毛本同案鄭當作歎因別體俗字鄭作鄭歎作歎

而譌左襄卅年正義引作姬觶之歎脫口字非也孫炎姬觶之口四字複舉經文也下云人歎則口開方營室東辟四方似人之開口故名爲姬觶之口

水昏正而裁

閩本明監本毛本同案裁當作裁形近之譌

乃爲位而平地

閩本明監本毛本地誤也

終然允臧

唐石經小字本相臺本同考文古本同閩本同明監本毛本然誤焉案正義云終然信善又云何害

終然允臧也皆可證明監本毛本正義中下然字亦誤焉

可謂有德音

小字本相臺本同案此定本集注也正義云君子出能此上九者故可為九德乃可以列

為大夫定本集注皆云可謂有德音與俗本不同依此則正義本不如此也但未有明文今無可考意必求之或當是

是可為九德

可以為大夫

小字本相臺本同案釋文云為卿大夫一本無卿字正義云獨言可以為大夫者以大夫

事人者是正義本無卿字考文一本有卿字采釋文

先升彼漕邑之墟矣

閩本明監本毛本同案經注皆作虛正義作墟虛墟古今字易而說

之也例見前標起止云傳虛漕可證釋文虛本或作墟非正義本

又出於陶丘北

閩本明監本毛本又作東案所改是也曹譜正義引作東

時文思索

閩本明監本毛本索誤素

可謂有德音

閩本明監本毛本首作音案所改是也

馬七尺以上曰駮

小字本相臺本同閩本明監本毛本亦同案釋文以上時掌反沿革例云諸本

皆是馬七尺曰駮唯余仁仲本有以上二字以釋文考之舊有是也考正義云七尺曰駮度人文也定本云六尺恐誤也此櫟栝傳及周禮耳諸本乃誤從之刪

而馬數過禮制

小字本相臺本同案釋文云過禮一本作過禮制正義云謂有此邳鄆之富而馬數

過禮制與一本同

以諸侯之牝

閩本明監本毛本牝作制案所改非也牝當作禮因禮作礼形近而譌

皆校人文也

閩本同明監本毛本校作按案此明監本避當時諱字耳毛本仍之非也餘同此

今就校人職相覺甚矣

閩本明監本毛本今誤令案矣當作異見周禮校人疏山井鼎

云覺恐較誤非也盧文昭云覺即較字是也詳見其鍾山札記

故其數皆倍而誤

閩本明監本毛本皆誤小

○蝦蟇

故君子見而懼諱

明監本毛本見上衍之字閩本剗入

○相鼠

而刺在位承先君之化

小字本相臺本同唐石經承上有不字案唐石經誤也正義云故刺其在

位有承先君之化無禮儀又云以其承先君之化弊風未革不當有不字

雖處高顯之處

小字本相臺本同案正義云猶鼠處高顯之居又云故箋言雖處高顯之居當是正

義自爲文也釋文高顯之處昌慮反

孝經曰容止可觀

閩本明監本毛本此下有注小字本相臺本無考文古本同案山井鼎云此亦

釋文混入於注者也考十行本下脫園圍山井鼎所云宋版上下相連者卽此故閩本以下致誤也

○干旄

鄉大夫賓之

毛本鄉誤卿閩本明監本不誤又下六鄉六遂大夫也同

有虞氏以爲綏

閩本明監本毛本同案綏當作綏又綏以旌牛尾爲之同下文皆不誤可證

天子以下建旃之者

閩本同明監本毛本之誤旃案此之字當在建字上誤錯於此下文

獨以爲卿之建旃者可證

知首皆注旄者

明監本毛本注誤註閩本不誤案因悉改注爲註遂并此而誤也

去其旒異於此

閩本明監本毛本此作生案所改是也

服氏云六人維王之大常

閩本明監本毛本同案服上浦鏜云脫節字是也

則此名亦有大夫

閩本明監本毛本同案名當作各形近之譌

亦爲五見之也

小字本同相臺本爲作謂閩本明監本毛本同案謂字是也考文一本爲謂複出者

誤

周道委遲

閩本明監本毛本委作倭案倭字非也倭本又作委見釋文異義所引正如此

互之聞也

閩本明監本毛本同案浦鏜云元誤互是也

○載馳

又義不得

唐石經小字本相臺本同案正義云定本集注皆云又義不得則爲有字者非也上文云有義不得

歸正義本當是有字也下文云又義不得二章以下者既從定本集注即改而說之也

宗國敗滅

閩本明監本毛本國誤廟

左傳服虔注

閩本明監本毛本注誤云

故爲此釋

明監本毛本爲此誤倒閩本不誤

爾女女許人也

小字本相臺本同案考文古本作爾汝也汝汝許人也考此與草蟲雄雉等箋同例

不當增加其字詳見上又注女字正義作汝乃易古字爲今字之例不當并注而改爲汝是其采正義之誤也以後

毛詩注疏校勘記

卷一

七

猶升丘采其蠃也

閩本明監本毛本同小字本相臺本無其字案無者是也

今人敗滅

閩本明監本毛本同案人當作之形近之譌

二章四句

唐石經小字本相臺本作二章章四句案重者是也閩本明監本毛本亦誤不重

鄘國十篇三十章百七十六句

閩本明監本毛本此下別起爲卷題毛詩注疏卷第三云

云誤也案山井鼎云朱板不分卷是也

○淇輿

司諫注云以義正君曰規

閩本明監本毛本同案規當作諫上引沔水箋已說規引

此說諫也

而云卿士而

閩本明監本毛本下而字作者案所改是也

亦皆類也

毛本皆誤此閩本明監本不誤

竹篇竹也

閩本明監本毛本同小字本相臺本篇作篇案篇字是也正義不誤釋文緣竹下云竹篇竹也

又篇竹本又作扁考爾雅說文及其餘字書無作篇者閩本以下正義中盡誤篇釋文亦有誤者今訂正見後考證

有康叔之餘烈

小字本相臺本同案此正義本也標起止云至餘烈及正義上下文皆可證釋文云

之烈一本作之餘烈即正義本也

如切如磋

唐石經同小字本相臺本磋作磋案此正義中字皆作磋釋文磋七何反爾雅釋文同考五經文字

磋治也在石部磋玉色鮮在玉部是唐人有以此字從石與

磋今磋今字別者說文有磋無磋磋本磋之俗字耳此經及傳并小雅谷風大雅卷阿桑柔箋皆當本是磋字周禮禮記

二釋文亦作磋

間寬大也

小字本相臺本同案釋文間下云寬大貌考釋文不云毛云鄭云者多所增損未必其本有貌

字也考文古本有采釋文

又言此有斐然文章之君子

閩本明監本毛本同案經傳作匪正義作斐匪斐古

今字易而說之也例見前釋文匪本又作斐同非正義本也標起止云傳匪文章可證

陸機云淇與二水名

閩本明監本毛本與作隩案隩字非也陸機不與傳意同無取爾雅

隩字釋文云草木疏云與亦水名可證也正義又引今淇與傍生此亦當作與誤作隩耳

以毛云隩隈爲誤

閩本明監本毛本同案經作與傳同正義作隩與隩古今字易而說之也

例見前標起止云傳與隈

會弁如星

唐石經小字本相臺本同案釋文云會古外反注同鄭注周禮則如字說文作脮案說文脮下引詩

脮弁如星許君稱詩當是毛氏而今毛詩不作脮者鄭箋之本不與許同也凡說文與鄭箋本異者多矣見於釋文者如脮說文作瘠我姑說文作乃所笈說文作庀妹說文作奴之屬皆與此同例悉不更出

弁皮弁所以會髮

小字本相臺本同段玉裁周禮漢讀考云疑有錯誤釋弁不當先於會一疑也

據正義鄭箋乃有皮弁字毛不言皮弁二疑也云皮弁可以會髮以釋經文會弁似涉皮傳三疑也當云髽所以會髮無弁皮弁三字為許叔重所本今考段說是也但釋文正義皆不作髽鄭箋本毛詩或亦用會字傳云所以會髮是毛以為骨撻之可會髮者與說文所解合而會為髽之假借鄭則仍如字讀之而以弁之縫中易傳也然則此傳作會所以會髮義可通

此云武公所服

明監本毛本云下衍弁字闕本剗入

故云謂弁之縫中也

闕本明監本毛本之誤其

若非外土諸侯事王朝者

闕本明監本毛本同案浦鏜云事當仕字誤是也

金錫練而精

小字本相臺本同闕本明監本毛本同案練字是也此借練為鍊正義亦皆作練可證其

不易為鍊而說之者即以練為正字不以練鍊為古今字也考文古本作練采正義闕本以下正義中練字盡改為鍊誤也

倚重較今

唐石經小字本相臺本倚作倚閩本明監本毛本同案倚字是也釋文倚於綺反正義云而此云倚

重較今序下正義云倚重較今是也皆其證此經倚倚假借在作傳箋時人共通曉故不更說車攻兩駢不倚同節南山有實其倚傳倚滿也箋倚倚也因易傳故說之亦是謂倚倚假借也其此正義云倚此重較之車今者易倚字為倚字而說之正義於古今字例如此與上下文直引經文者不同例也考文古本作倚采正義而誤經義雜記引曲禮正義荀子楊注文選李注皆作倚疑從犬者譌其說非也又據釋文正義石經說文繫傳羣經音辨以為唐人雖多引作人旁未若從犬者尤為信而可徵得之矣凡昔人引書或改或不改非有成例用之資證則可若以為典要則其失多矣

雖則戲謔

相臺本同閩本明監本毛本同小字本則作常案則字是也

○考槃

使賢者退而窮處

小字本相臺本同唐石經處下有也字考文古本有亦偶合

長自誓不忘君之惡

明監本毛本惡誤志閩本不誤

適飢意

小字本相臺本同閩本同明監本毛本飢誤饑案五經文字云饑飢上穀不熟下饑也經典或借用

下字依此則飢餓字從未有借為饑者明監本毛本誤甚餘同此

○碩人

國人閔而憂之

小字本相臺本同案盧文弨云唐石經下有故作是詩也五字剗缺猶可辨今考正義標

起止云至憂之是正義本當無此五字

不被荅偶

閩本明監本毛本偶誤遇案此荅偶二字出自華箋彼文偶作耦耦偶字同偶者人意相

存偶也見儀禮禮記注即匪風箋之人偶還箋之揖耦不知者改為遇誤甚

碩人其碩

唐石經小字本相臺本同案經義雜記云玉篇頁部引作碩人碩碩據鄭箋知詩碩字本重文六朝

時猶未誤其說非也考經文一字傳箋疊字者多矣如明星有爛箋云明星尚爛爛然等是也玉篇乃依箋疊字耳非六

朝時經有作碩人碩碩之本也釋文云其碩其機反正義云有大德之人其貌碩碩然長美皆經文作其字之證

長麗俊好

小字本同閩本明監本毛本同相臺本俊作佼案佼字是也正義釋文皆可證考文古本作佼

采正義釋文

國君夫人翟衣而嫁今衣錦者

小字本相臺本同閩本明監本毛本同案翟衣當作

衣翟釋文經衣錦下云注夫人衣翟今衣錦同是釋文本作衣翟也正義云當翟衣而嫁今言錦衣非翟衣乃正義自為文但說注意耳不取與注相應也其箋當亦是衣翟不知者用正義文改注文考古本夫人下衣錦下共有衣字采正義釋文又誤合之也

毛以為有大德之人

閩本明監本毛本有誤其

孔世家云

閩本明監本毛本同案孔下浦鏜云脫子字是也

丰云衣錦娶衣

閩本明監本毛本丰誤毛下丰云錦衣娶裳同

女次紵衣纁襍

閩本明監本毛本同案紵當作純因改純帛字遂并此而誤

先生為姊

閩本明監本毛本為誤謂

蝻蟻蝻蟲也

小字本相臺本同案此正義本也標起止云蝻蟻蝻蟲又云今定本云蝻蟻蝻也無蟲字

與爾雅合釋文蝻也音曷當以定本釋文本為長

故禮記云其頸五寸

閩本明監本毛本同案浦鏜云依投壺文當七寸誤是也

瓠犀瓠瓣

小字本相臺本同案正義云釋草云瓠棲瓣也今定本亦然謂無下瓠字也釋文瓠瓣補遍反

亦有當以定本為長

舍人曰小蟬也青青者

閩本明監本毛本同案此不誤浦鏜云蜻蜻誤青青非也以青

青釋蜻蜻所謂詰訓之法

美目盼兮

小字本相臺本同閩本明監本同唐石經盼作盼毛本同案盼字是也

朱幘鑣鑣

唐石經小字本相臺本同案釋文鑣鑣表驕反馬銜外鐵也一名扇汗又曰排沐爾雅云鑣謂之鑣

考傳云幘飾也人君以朱纁鑣肩汗且以爲飾鑣鑣盛貌正義云此纁鑣之鑣自解飾之所施非經中之鑣也故又云鑣鑣盛貌釋文誤以纁鑣解係鑣鑣下段玉裁云玉篇引詩朱幘儻儻載驅作儻儻考廣雅云鑣鑣盛也說文引詩朱幘鑣鑣然則此經假借鑣爲儻也

以入君之朝

毛本以誤衣明監本以上皆不誤

碩人至君勞

毛本誤作碩人敖敖至無使君勞明監本誤單行另書閩本不誤

毛以爲言有大德之人

毛本爲下誤有傳字閩本明監本無

餘同

明監本毛本餘誤不閩本不誤

庶庶傳曰盛貌與此同也

閩本明監本毛本同案浦鐘云盛傳作武是也與此同者

謂清人之庶庶與此鑣鑣字同非謂傳同訓盛也不知者改之耳

旦罷歸

閩本明監本毛本同案浦鐘云且誤且下同是也

要事畢否大夫

閩本明監本毛本大夫上有在字案所補是也

鱣鮪發發

小字本相臺本同唐石經初刻撥後改發案初刻非也考釋文云發發補末反盛貌馬云魚著罔尾

發發然是初刻依馬義而改用撥字也舊唐書譏石經字體乖師法此類是也

則非曰國中之女

閩本明監本毛本同案浦鏗云日當目字誤是也

毛詩注疏校勘記卷一

臣顧廣圻校字